

Э. Модерзон



**ШАЙТАННЫҢ
ШЫРМАУЫНДА**

Эрнст Модерзон

ШАЙТАННЫҢ ШЫРМАУЫНДА



«ШЫҒЫС
СӘУЛЕСІ»

УДК 2
ББК 86.3
Ш-90

М 65 Модерзон Эрнст
Шайтанның шырмауы – Алматы: «ШЫҒЫС СӘУЛЕСІ»,
2009 – 100 бет

ISBN 9965-896-11-9

Бұл кітапта жақсылық пен жамандықтың айқасы туралы жазылған. Автор өмірден алынған көптеген мысалдар арқылы бізге жын-шайтан тудыратын сансыз қауіп-қатер жөнінде айтады.

УДК 2
ББК 86.3

Қазақ тіліне аударған: “ШЫҒЫС СӘУЛЕСІ” баспасы

М 0403000000
00(05)-09

ISBN 9965-896-11-9

“ШЫҒЫС СӘУЛЕСІ”, 2009

*Азғырылмау үшін сергек болып,
сиынып мінажат етіңдер.*

Матай 26:41

Алғы сөз

Мен бұл кітапта оккультизм саласындағы ғылыми зерттеу жұмысының нәтижелерін келтіруден аулақпын. Менің алдыма қойған мақсатым – түрлі арбау амалымен қапыда шайтанның шырмауына түсіп қалып, енді содан қалай құтылудың жолын білмей дал болған адамдарға қол ұшын беру. Соларға шын ниетіммен көмектесіп, ақыл қосып, тыныштыққа апаратын азаттық жолын көрсетсем деймін. Сонымен қатар, ырымға беріліп шайтанның торына түсіп қалған, бірақ мұнысынан бейхабар қаперсіз жандарға да көмектескім келді. Мұндай адамдарға бақсылық, жауырын қарау, тәуіптік, құмалақ салу, карта ашу, астрология, сәуегейлік, дуалау, көз байлау, магнетизмнің арты жақсылыққа апармайтынын түсіндіруге және көрсетуге тырыстым. Бұларда қара түнектің өктемдігінен құтылуға талпыныс жасау сезімін оята алсам, ойымның жүзеге асқаны деп білемін. Үшіншіден, Құдай Сөзін уағыздаушыларға да көмек беруді ойладым. Амал не, кең етек алған сиқыршылықтың күнә екендігі туралы аз айтылып жүр. Көптеген адамдардың Құдайға жол таба алмай, адасып жүрулерінің себебі де дәл осыдан.

Мен өзбасынан өткентәжірибелерге сүйеніп айтқан куәгерлерге көбірек сөз беруге тырыстым. Өйткені, сөзбен ұқтырудан гөрі шайтанның шырмауынан

құтылған адамдардың куәліктерін айғақ ретінде келтіріп түсіндіру ұтымдырақ болатыны белгілі.

Жоғарыда айтылған мәселелер төңірегінде «Тәңір алдындағы пәктік» атты апталық газетте мақалаларым жарияланғаннан кейін, мен адамдардан көптеген хаттар алдым. Хат иелері өмірлерінде өзгеріс болмау себептерінің сырын енді ғана түсінгендерін жазыпты.

Мен осы кітапта айтылған айғақтар арқылы әлі де шайтанның шырмауында жүрген жандардың қараңғы түнек басқан саналарына Құдайдың нұр шапағаты төгілсе, көптеген адамдарға өздерінің бұғауда екендерін сезініп, Құдайдың ғажайып жарық әлеміне қол созуларына мүмкіншілік берерін қалар едім.

Эрнст Модерзон, Бад-Бланкенбург 1924 ж.

Мен неліктен осы кітапты жазуға бел будым?

Осыдан бірнеше жыл бұрын Элиас Шренктің уағыздарын тыңдаған едім. Ол сиқыршылықтың күнә екендігін және бұл істе Құдайдың есімі жиі қолданылатыны туралы айтты. Сонда мен іштей: “Ол бұл туралы неге көп айта береді? Біздің заманымызда мұндай істермен айналысушылар жоқ қой. Шынымен-ақ әлі де бақсы құшынаштар мен сиқыршыларға сенетіндердің бар болғаны ма? Біздің қазіргі жаппай сауаттылыққа жеткен кезімізде ырымшылдыққа жол берудің жөні жоқ қой” – деп ойладым.

Бірақ мен көп кешікпей жан қамқорлығы ісінде біртіндеп тәжірибе жинақтай бастадым: бұл істе қауым қызметкерінен гөрі жиі ел аралап жүретін уағызшының мүмкіндігі мол. Маған көптеген адамдар келіп, өздерін еріксіз Құдайға тіл тигізуге итермелеген қара күштер туралы айтып шағымданатын. Олар ойларына жүректен шықпаған сөздерді өзәзіл зорлап енгізетінін сезінеді. Бір белгісіз қара күш олардың ойларында Құдайға қарсы ойларды туындатады. Құдайға, дәлірек айтқанда Киелі Рухқа қарсы мұндай ойлар әсіресе олар мінәжат етуге, Киелі кітапты оқуға немесе жиналысқа баруға қамданған сәттерде пайда болады.

Мен осы ауыр жайға душар болған адамдармен жақынырақ сұхбаттасқанда, олардың жас кезінде немесе балалық шақтарында “дуаланғандары” анықталды. Сірә, қарт Шренктің жиі айтқандары дәл осының өзі болса керек. Бірақ та сол кезде мен Құдайға қарсы ойлардан азап шеккен адамдардың

бұрынырақта дуамен қатысы болғандықтарына жәй ғана кездейсоқтық деп қарадым.

Мұндай жайттардың жиі кездескені сондай, мен мұнда бір ішкі байланыс бар болар деп күдіктене бастадым. Айтса айтқандай, дуалау Құдайға тіл тигізуге алып келеді екен. Маған мұның түсінікті болғаны соншалықты, Құдайға тіл тигіздім деп айтушылардың сөзінің соңын тоспай-ақ оларға: “Сіз жас кезіңізде дуалаушыға барғансыз ғой?” – деп нық сеніммен айтатын болдым. Олар көбіне: “Оны қайдан білдіңіз?” – деп үрейлене, әрі таңдана сұрайтын. Мен оларға өзімнің Ізгі хабарды уағыздау тәжірибемде ондайларды көп кездестіргенімді және Құдайға тіл тигізу әрқашан да сиқыршылық, яғни дуаланудың салдарынан болатынын айтатынмын. Кейбіреулер ештеңе білмейтіндерін тілге тиек етіп, азар да безер болды. Сонда мұндайларды аныққанығын аналарынан сұрап біліп келуге жіберетін болдым. Ал оның нәтижесі көбіне дерлік: “Иә, солай болған екен”, – деумен аяқталатын.

Ал ата-анасы қайтыс болған немесе олар өздерінің дуаланғандарын мойындаудан үзілді-кесілді бас тартқан жағдайда мұны дәлелдеу қиынға түсетін. Бірақ осы қауіпті байланысты жиі кездестіргенім сондай, тіпті оны дәлелдеу мүмкін болмаған жағдайдың өзінде мен осы адамдарға дуалаушылықтың қатысы барлығына шүбә келтірмейтін болдым. Тіпті кейде ата-аналары болған істі жасырып, арбаушымен ешқашан араласпағанын айтып ант-су ішетіндері бар. Мұндайда балаға көмек бола ма деген ниетпен босандырып алушы жаңа туған сәбиге дуа оқыған. Тюрингиядағы бір деревняда босандырушы әжей

ондаған жылдар бойы әр жаңа дүниеге келген нәрестені дуалаған.

Уақыт оза келе тағы да бір шындыққа көз жеткіздім. Менің жан тыныштығын қажет еткен адамдармен жиі әңгімелесуіме тура келетін. Оларға Құдайдың рахымшылығын түсіндіріп, Құтқарушыға сенім арту керектігін айттым, бірақ амал не, көбінің талпыныстары мен мінәжаттары нәтижесіз болып, олар сенімге келе алмады. Дуалау олардың тәубеге келулеріне кедергі келтіретін.

Көпшілігі тәубеге келгенімен, шынайы тыныштыққа ие бола алмады. Олар қайтадан: “Мені Құдай шынымен-ақ қабылдады ма? Құдай менің күнәларымды шынымен кешірді ме?” деген күдікті ойдан арыла алмады. Олардың құлағына әлдекім: “Сені Құдай қабыл еткен жоқ, өлімге душар боласың! Барша талпыныстарың бос әурешілік!” – деп үнемі сыбырлап тұратындай сезім пайда болған.

Содан соң көріпкелдікке сенген-сенбегендеріне қарамастан, балгерлерге өз болашағын білу ниетімен карта ашуға ерік берген адамдармен де дәл осындай жағдай болады деген тұжырымға келдім. Бұл, тіпті, өзің үшін аштырған күннің өзінде де әлгі нәтижеге әкеледі. Киелі кітап курсында болған оқиғаны ешқашан ұмытпаспын деп ойлаймын, орайы келіп тұрғанда соны сіздерге де айтып берейін.

Бір жас жігіт шын пейілімен Құдай жолына түсуге ниеттенеді. Ата-анасы сенуші болғандықтан, ол өзінің де тәубеге келуі керектігін білетін. Мен оған сенімге апаратын жолды нұсқап, екеуіміз бірігіп мінәжат еттік, бірақ онымыздан ештеңе шықпады! Біз қайтадан әңгімелестік, бірақ бәрі бекерге кетті

– мен дiттеген мақсатыма жете алмадым. Сонда курсымызда оқитын тәжірибелi бауырласты бiзбен бiрге мiнәжат етуге шақырдық. Бiрақ ол да сол мақсатқа жетпедi. Үшiншi бауырластың да көмегi нәтиже бермедi. Сонда мен әлгi жiгiттен оның арбаушымен қарым-қатынасы болған-болмағанын сұрадым. Ол мұның мүмкiн емес екенiн, ата-анасы сенушi адамдар болғандықтан, олардың мұндайға жол бермейтiндiктерiн айтты. “Ал өзiңнiң қатысың болған жоқ па?” – деген сауалға ол студент шағында картамен бал ашушыға барып, болашағын айтып берудi сұрағанын күле отырып есiне алды. Сонда мен оған: “Мiне, сенiм жолына түсе алмауыңның себебi осы. Сен қара күштердiң ықпалынан шыға алмай жүрсiң”, – дедiм. Бұған сене алмаған жас жiгiт күлiп: мұның себебiнiң осы болуы мүмкiн еместiгiн айтты. Жас жiгiт менiң кеңестерiме құлақ аспады, сөйтiп өз жанына тыныштық таба алмай үйiне қайтты.

Осындай жайларды өте көп кездестiргендiктен, мен өз уағыздарымда осы мәселе туралы жиiрек айтатын болдым. Сөйтiп, ертедегi бақташы Шренк секiлдi, менiң де тыңдаушылардың назарын осы мәселеге аударуыма тура келдi. Соның нәтижесiнде осы күнәнiң шырмауында жүргенiн айтып, шағым жасаған адамдар менiмен сөйлесуге көптеп келетiн болды. Арбаушымен қатынаста болған адамдармен көбiрек кездескен сайын, бұл туралы газетке кеңiрек жазудың қажет екенiн сезiндiм. Соның нәтижесiнде маған осы күнәнi мойындаған хаттар көптеп келе бастады. Қазiр күн сайын дерлiк әлдекiм ауызша немесе жазбаша түрде осы мәселемен бөлiсетiн болды.

Жан қамқорлығы тәжірибесінен білетінім бойынша айтсам, өзезілдің сұмдық күнәға батырар айласы адамдардың арасында кең тараған және осы күнәнің азабын арқалап, шайтанның шырмауынан шыға алмайжүргендеріқаншама. Адамдарғақамқоршылық жасаушылардың бұл туралы аз айтатындарына және басылымдарда оккультизм мәселелері жарық көрмейтініне таңдануға тура келеді. Дуалауды халық медицинасының тәсілі деп есептейтіндер шайтанның билігінде. Мәселен, ауырған кезде немесе сүйелден арылу үшін адамдардың көпшілігі дәрігерге барудың орнына “көмектесе алатын”, “ауруды дуалай алатын” балгерлерге баратын жайлар көптеп кездеседі. Рас, оның көп жағдайда септігі тиеді. Сондықтан да көпшіліктің пікірінше дуалау залалсыз, тіпті, ізгі іс болып есептеледі. Әсіресе, мұндайда Құдай есімдері қолданылса, тіпті ерекше!

Балгерлерге барушылар ғана емес, өздері осымен айналысатындар да солай деп есептейді. Олар бұл пайғамбарлар қалдырып кеткен Киелі кітапқа сай көне емдік тәсіл, мұны сиқыршылық және күнә деп санайтындар тәубелеріне келулері қажет деседі. Бірақ мен дуалауды сенімнен, Құдаймен қатынастан және мәңгілік өмірден ада ететін ауыр күнә екенін саналы түрде айтамын. Дұшпанның айла шеберлігі бұл күнәні зиянсыз, онымен қоймай құрметті және Киелі кітаптан деп сендіруінен көрінеді. Шын мәнісінде, бұл барып тұрған күнәнің өзі, мұны Құдай Сөзі айыптайды және қатал түрде жазалайды.

Жоғарыда келтірілген жайттарды ой елегінен өткізе отырып, мен осы салада жинаған азды-көпті тәжірибемді өздеріңізбен бөліссем деген шешімге

келдім. Әлі де адамдардың көпшілігі мұны күнә деп сезінбейді, сондықтан өздерінің өмірлеріндегі ақылға қонбайтын әдеттен тыс жағдайлардың болу себептерінен, неге жан тыныштығын ала алмай отырғандарынан бейхабар. Мен мұндайларға былай дер едім: “Қараңдар! Оның себеп-салдары мынау! Қашан сіздер тәубеге келіп, мұны күнә деп мойындамайынша, шайтанның шырмауынан шыға алмайсыздар”.

Адамдарға жан қамқорлығын көрсетушілерге көмектесу де ойымда бар. Жоғарыда аталған күнәлардың ішінде жасырынған қара ниетті күштің бар екенін адамдардың көпшілігі біле бермейді. Бақташылар оларға бұл туралы айтпайды, сондықтан да көптеген адамдар өздерін қинап жүрген кесепаттың түп-тамыры осы күнәдан бастау алғанын түсінбейді.

Ұзақ жылдар бойы Ізгі хабар таратушы қызметін атқарғандықтан, Құдай Сөзінің таралуына шайтанның барынша кедергі жасап бағатыны маған көптен мәлім. Елшілік қызметпен бір жаққа жиналсам-ақ болды, аяқ астынан өзім немесе жақындарымның бірі науқастанып қалып, қызметіме кедергі жасайтын жағдайлар басымнан жиі өтті. Әрбір Ізгі хабар тарату шарасы шайтанның билік құратын аймағына қол сұғу болып табылады және ол бұған кедергі жасау үшін қолынан келгеннің бәрін істеп бағады. Бірақ дұшпан менің жолыма қаншалықты үлкен кедергі жасаса, алдағы жұмыстан соншалықты мол рақымдылық күтуге болатын.

Елукүндік мейрамында орман ішінде өткен жиналыстардың бірінде үш қызметкер: “Киелі Рух келі-

сімен, Ол осы дүниенің күнәһар екенін әшкерелейді” деген тақырыпта уағыз айттық. Біріншісі – “Маған сенбеу – күнә”, екіншісі – “Мен Әкеме бара жатырмын” деген тақырыпта сөйледі. Ал маған “Сот туралы, осы әлемнің билеушісі шайтанға әлдеқашан үкім шыққаны туралы” уағыз айтуды ұсынды. Мен Құдайдың Голғотада шайтанды биліктен айырып, оған үкім шығарғаны жайлы, енді оның жеңіліс тапқан билеуші екендігі туралы шабыттана куәлік бердім.

Осыдан кейінгі аптада менің жағдайым қалай болды десеңіздерші! Қандай ғана азғыруларды басымнан кешірмедім! Бірақ, Құдайға тәубе, Оның арқасында бәрінен аман қалдым, Ол өзіне тән мейірбандығымен маған көмектесті. Ал шайтан болса, мені торына түсіру үшін қандай сұрқия істерді қолданбады десеңізші! Сонда мен мынаны түсіндім: біз шайтан туралы айтқанда және оның жеңілгенін ауызға алғанда, өзәзілдің өзімен айқасқа түседі екенбіз. Мен осы еңбегімде Киелі кітап сиқыршылықтың салдарынан жасалатын күнәлар туралы және шайтанның шырмауынан қалай құтылуға болатыны жөнінде не айтатынын көрсетіп, куәлік еткім келеді.

Құдай бұл кітапты жарылқаушылық құралы ретінде қолдана көрсін, шайтанның шырмауына іліккендер Тәңіріміздің еркіндік қуанышына кенелсін!

Киелі Жазба не айтады?

Бұл тақырып Киелі Жазбаның көптеген орындарында қарастырылады. Заңдарды қайталау кітабының 18-тарауының 9–14-аяттарына қарайық. Бұл жерде Құдай Мұса арқылы Исраил халқына олар Қанахан жеріне келген кезде ұстанып жүруге тиіс ережелерді береді: “Сен өзіңнің Құдайың Тәңір қоныстандырар жерге аяқ басқанда, сондағы тұратын халықтың жасағанындай жексұрын істерге үйренуден сақ бол. Сенің араңда ұлын немесе қызын оттан өткізуші, сәуегей, бал ашушы, көріпкел, арбаушы, ырқына көндіруші, аруақ шақырушы, сиқыршы немесе аруақтармен тілдесуші болмауы тиіс. Өйткені мұны жасаушылардың бәрі Тәңір алдында жексұрын саналады, сондықтан сенің Құдайың оларды араларыңнан қуады. Өз Құдайың – Тәңірдің алдында пәк таза болып жүр. Өйткені, осы қоныстан мен қуайын деп отырғандар бал ашушылар мен сәуегейлерді тыңдайды, ал сенің Құдайың саған ондайға жол бермеген”.

Бұл жерде Құдай алдында жексұрын істер деп саналатын күнәлардың тізімі берілген. Біздің көз алдымызға сиқыршылық пен балгерліктің қорқынышты сұрықсыз болмысы мен жан шошынар бейнелері келеді. Құдай мұндай істермен айналысуға айқын да анық тыйым салады.

Балаларды құрбандыққа әкелу

Біріншіден, израилдіктердің арасында “өз балаларын оттан өткізушілер” болмауға тиіс екендігіне нұсқау берген. Бұл нені білдіреді? Израил халқы келуге тиісті елде өз балаларын Молохқа құрбандыққа шалатын сұмдық әдет-ғұрыптар болды. Әдетте тұңғыш балалар құрбандыққа шалынатын. Молох мүсінінің ортасы қуыс болатын да, соған от жағылатын. Әбден отқа қызған пұттың қолына сәбилерді салып, олар ауыр азаппен өлетін. Құдайдың сыйлығы – балаларды жансыз бір тұлға үшін құрбандыққа шалу қандай ауыр күнә десеңші?! Осы бір сұмдық әдет-ғұрып жиіркенішті болып көрінгенімен, бұл израилдіктер арасында да кездесетін жағдай еді. Бұл туралы біз Патшалықтар туралы 4-жазбаның 17:17-аятынан оқи аламыз. Біздің алдымызда өз қылықтары үшін Ассирияға тұтқынға берілген Израил халқының тарихы баяндалады. Онда: “Өздерінің ұлдары мен қыздарын оттан өткізіп, балгершілікпен, сиқыршылықпен айналысып, Тәңір алдында ұнамсыз істерді істеп, Оның қаһарына ілігеді” делінген. Мұндай сұмдық жағдайлар тек Израил халқында ғана емес, Солтүстік патшалықта да болды. Балаларды құрбандыққа әкелетін Молохтың тас мүсіні бүкіл Яһудеяда да орын алды. Тіпті Яһудея патшасы Ахаздың өзі “Жаратушы Ие Израил ұлдарының арасынан қуған халықтардың жексұрын істеріне еліктеп, өз ұлын оттан өткізді” (4Патш. 16:3). Бұл жерден біз Құдайдан қорқатын Езекия патшаның ұлы Манассия туралы да оқимыз: “Ол да өз ұлын оттан өткізді, бал ашты, өзінің сарайында

аруақтарды шақыратындарды, сиқыршыларды ұстады; Тәңірге көптеген ұнамсыз жексұрын істер істеп Оның қаһарына ілікті” (4Патш. 21:6).

Қазіргі күндері де әлі дүниеге келмеген балаларды құрбандыққа шалу оқиғалары өте жиі кездеседі. Осы күні жасанды түсік тастатып, Құдайдың жарылқауы болып саналатын сәбилерді өмірге келтірмей өлтіру біздің тарихымыздағы қара таңба болып табылады. Қазір адамдар балаларға Құдайдың жарылқауы емес, мойынға ілінген ауыртпалық ретінде қарайды. Бұл салада дұшпан әлі де өте күшті әрекет етуде!

Сәуегейлер

Заңды қайталау кітабының 18-тарауынан біз сол кездегі сиқыршылықтан туындайтын күнәлар туралы оқимыз. Онда сәуегейлер, бал ашушылар, түс жорушылар және т. б. жөнінде айтылады. Сонда бұлар кімдер? Целлердің «Киелі кітап сөздігінен» мынандай жолдарды оқимыз: “Бал ашушылар түрлі әдістерді қолдана отырып, біздер үшін беймәлім рухтар әлеміне еніп, қара ниетті шайтан күштерімен байланыс жасайды”.

Адамдар сәуегейлік жасауға қалай жетті? Адам жүрегінің түкпірінде болашақтың құпиясын ашсамау деген тілек жасырынып жатыр. Көптеген адамдар алдағысын болжауды, өздерін не күтіп тұрғанын білуді армандайды. Бұл сұрақтарға Құдай Өзінің Сөзі мен Киелі Рухы арқылы жауап береді. О дүние және болашақ туралы білуге тиіс нәрселерімізді бізге Киелі кітап ашып береді. Одан біз Құдайдың перзенттері болғандықтан Мәсіхпен бірге Оның

мұрагерлері болатынымыз, егер біз үшін шындық салтанат құратын жаңа жер мен жаңа аспанның бар екеніне кәміл сенсек, онда Мәсіхпен мұралас болатынымыз туралы оқимыз.

Бірақ адамдар Құдайдың айтқандарына онша қанағаттанбайды. Олар көбірек білгілері келеді. Егер Құдай бұл тілекті қанағаттандырмаса, онда адамдар айналма жолдар арқылы өздерін болашақта не күтіп тұрғанын білуге тырысып бағады.

Егер адам өмір жолымен қалай дұрыс жүруді білгісі келсе, Құдай Өз Сөзін, Өзінің Киелі Рухын берді. Сол арқылы бізге жол сілтейді, жауап береді және бір дербес шешімге келтіреді. Құдай бізге Киелі Рухымен жетекшілік етеді. Бірақ бұл құнды жетекшілікке біз тек Оның перзенттері болып қабылданғанда ғана қол жеткіземіз. Елші Пауыл Киелі Рухтың жетелеуімен өмір сүретіндердің бәрі де Құдайдың балалары екендігін айтады. Құдайдың балаларының санатында болу Киелі Рухтың жетегімен біртұтастықта. Адамдар белгілі бір шарттарды орындағысы келмейді, Құдайдың жетегінен бас тартып, өзге жолдарды іздейді. Олар өздерін Құдай қанағаттандырмаған жағдайда сәуегейлерге иек артады, сөйтіп, Құдай айтпағанды осы сәуегейлер арқылы шайтан айтады.

Әр халықта болашақты болжау сан түрлі дамыған. Алдағыны болжау негізінде – құдайлар болашақта не болатынын біледі, сондықтан адамдар сауалды дұрыс қойып, олардың берген белгілерін дұрыс түсіне білсе, онда бұл сыр адамдар алдында ашылады деген ой жатыр. Бүкіл пұтқа табынушылар дүниесі қара ниетті күштің ықпалында болғандықтан, жын-

перінің араласуынсыз, оның ықпалынсыз алдағыны болжап айту мүмкін емес.

Қазіргі және бұрынғы болашақты болжау әдістерін салыстыра келе, біз сол ескі әдістердің қазір де қолданылып жүргеніне көз жеткіземіз. Бұрын сөзбен және жеке адамның делдалдығы арқылы алдағыны болжап айтатын, сонымен қатар түрлі белгілерді түсіндіре отырып айту да қолданылған.

Сәуегейлер өздерін жоғарыдан берілетін ерекше «нұрдамыз» деп есептейді. Шынында да олар ақыл-ойды шатастыратын және басқа құралдардың көмегімен желігіп немесе ұйқылы-ояу қалыпқа келе алатын. Көріпкелдікпен көбінесе әйелдер айналысқан. Бұған әйел жан-дүниесі өте жақсы сәйкеседі.

Біздің заманымызда да көптеген әйелдер осы іспен айналысады. Адамдардың болашақты болжауы – Құдайдың және Оның Рухының билігімен емес екенін байқаймыз. Бұл туралы Елшілердің істері кітабының 16-тарауынан оқимыз. Філіпіліктер жерінде елші Пауыл бойында сәуегейлік рухы бар күтуші әйелді жолықтырды. Өлгі әйел: “Мына кісілер – Құдай Тағаланың құлдары, олар сендерге құтқарылу жолын уағыздайды!”, – дегеннен басқа ештеңе айтпаса да, Пауыл оны жын-шайтанның жайлап алғанын сезді. Әйелдің айтқаны таза шындық болғанымен, Пауыл оның басшысы өтіріктің атасы – әзәзіл екенін түсінді. Сондықтан да Пауыл әйелден ол арқылы сөйлеп тұрған жын-шайтанды аластатты. Көп кешікпей шайтан Пауыл мен Силадан кегін қайтарды. Олар қызыл ала қан болғанша соққы жеп, қараңғы қапасқа тасталды. Болашақты болжаудың бір тәсілі – адам ақыл-ойын қара ниетті күшке бергенде, шайтан сол

арқылы тікелей әрекетке кіріседі. Ал кеңінен тараған келесі тәсіл, бұл:

Белгілер мен құбылыстарды пайымдау

Жалған құдайлардың еркін білу үшін адамдар белгі, нышандарды қолданды. Ошия пайғамбардың кітабындағы 4-тараудың 12-аятында былай деп айтылған: “Менің халқым өз ағашынан сұрайды, ал оның аса таяғы оған жауап береді”. Бұл былай болатын: жерге аса таяқ тасталады да, оның түсу қалпына орай сәуегейлер өз қорытындыларын жасайды. Бұның өзі карта арқылы болашақты болжау тәрізді немесе күміс теңге тастаумен салыстыруға болады. Бет жағы немесе екінші жағына қарап мәселені шешеді.

Тостағанмен бал ашу да осы тектес. Мұны біз тек Мысырдағы Жүсіптің кезінен ғана емес (Жар. бас. 44:5), қазір де кездестіреміз. Кофе қоюына қарап немесе Жаңа жыл алдындағы бал ашуды еске түсіріңіздерші.

Ертеде адамдар өздерінің терафим деп атайтын құдайсымақтарынан сұраған. Бұл қалай жүзеге асырылды, ол жағы бізге беймәлім. Бұл әдіс жеребе тастауға ұқсас болуы мүмкін. (Ұрим және Тұмим – Бас діни қызметкер оларды Құдайдың еркін біліп алуға қолданатын). Қазіргі уақытта да кейбіреулер, тіпті сенушілердің өздері Киелі кітапты бал ашуға пайдалануда. Бұл былай істеледі: Киелі кітапты алып, ойланған сұрақтың жауабы оң немесе сол жақ беттегі аяттың реттік саны болсын деп белгілейді де, Киелі кітапты қарамай ашады. Өлгі аятты

оқып, Құдайдың жауабын шешуге тырысады. Бұл күмәнді іс үшін, екінші өсиетте тыйым салынғанына қарамастан, Жыр жинағын да пайдаланады.

Бұдан әрі болашақты болжап айту үшін белгілі құбылыстарды бақылап зерттеп ереже бойынша сәуегейлік жүргізетін. Біріншіден, бұған күннің, айдың тұтылуын бақылау жатады. Күннің күркіреуі мен найзағайдың жарқылдауына (әсіресе ашық аспан аясында) маңыз беріледі. Бұлттың түр-түсімен сыртқы көрінісінің де өзіндік мәні бар. Жұлдыз бойынша болжау қазір де кеңінен таралған. Бүгінгі күні Жұлдызнаманы кезкелген ақпарат құралдарынан күнделікті табасыз. Тіпті, сауатты, білімді деген адамдардың арасында да жұма мен дүйсенбі күндері жауапты жұмысын бастамайтындардың бары адамды таңқалдырады. Бұлардың пікірлерінше, бұл сәтсіз күндер. Ал оларға керісінше бейсенбі мен сейсенбі күндері бастаған жұмыс тез жүретін секілді болып көрінеді.

Аспан мен жер арасында ұшып жүретіндіктен, ертеде құстар Құдайдың елшісі деп есептелетін. Алда болатын оқиғаларды адамдар осы құстардың ұшуы және дауыс беруі арқылы болжаған. Құдайға құрбандық берілген кезде шалынған малдың бауыры мен қанының түр-түсі мен пішіні қандай екеніне, оттың түсіне, күлдің түріне дейін назар аударылатын. Күтпеген жерден біреуді жолықтыру немесе түшкіріп қалу да ерекше белгі болып саналады. Наполеон мен Вольтер білімді адамдар болғанына қарамастан, құстардың дауыстарына зер салғандары белгілі. Бірқатар нышандарды алып қарайық: адамдар жапалақтың дауысынан әлі күнге

дейін ажал немесе басқа да бақытсыздық әкеледі деп қорқады. Қай аңшы, немесе жолаушы ең алғашқы болып егде әйел жолын кесіп өтіп кетсе, бүгін сәтсіз күн болады деп қапаланбайды? Егер де қара мысық жолды кесіп өтіп кетсе, оң жақтан қой отары өтсе, немесе табалдырықта сабан жатса жаман ырым деп есептейді. Егер сөйлесіп тұрғанда біреу түшкірсе, әңгіменің шын болғаны. Біз әлі де ырымдар мен әр түрлі кең етек жайған, сайтан билеген, жалған тәңірге табынушылар арасында тұрып жатырмыз. Бұл жерде өте сақ болған абзал.

Әуел бастан адамдар түс жоруға үлкен мән берген, өйткені түс арқылы Құдай адамдарға ашылуы мүмкін. Бұл туралы Киелі кітапта бірқатар мысалдар келтірілген. Қараңғы қапаста отырған Жүсіп шарап құюшы мен наубайшының түстерін жориды. Ол жеті семіз және жеті көтерем сиыр, жеті масақ туралы түстерді жориды. Даниел болса, Наушаруан патшаның түсін жорып береді. Құдай түс арқылы пенделеріне өсиет айтқысы немесе ашылғысы келуі мүмкін. Бірақ көп жағдайда мән-мағынасыз түстер де болады. Міне, осы сәтте түс жорушылар, сәуегейлер көмек беруге тырысып бағады. Мұнда түс жору туралы жазылған қомақты немесе шағын кітапшаларды көруге де болады. Шынын айтсақ, осы кітапты оқымаған адамның саны кемде-кем шығар. Мұндай кітаптардың авторлары бүкіл түсті қалтқысыз түсіндіреді.

Бір кездері түс – Құдай еркін анық білдіретін ең сенімді құрал деп есептелінді. Сондықтан адамдар түс көруді армандады. Мәселен, өлген адамдардың зиратына барып түнегенде көрген түстері – ата-

бабаларының хабары немесе тілегі деп түсінді. Түс көру үшін небір хош иісті заттар, тағамдар пайдаланылды. Мұндай құралдарға Езекиел 13:18-де жазылған Киелі Жазбадағы «сиқырлы қалталары» да жатады.

Осы секілді болашақты болжаудың әдістері туралы көптеген кітаптар жазуға болар еді. Заңдарды қайталау кітабының 18-тарау, 9–14-аяттарында сәуегейлер, бал ашушылар, арбаушылар туралы айтылған. Олар жұлдыздардың орналасуын қадағалай отырып, бірқатар күндер сәтті, ал басқалары сәтсіз күндер деп белгілеген. Ежелгі римдіктер күндерді қара – сәтсіз, ақ – сәтті және мағынасыз күндер деп бөлген. Яһудилердің де өздерінің жақсы және жаман күндері болған.

Тіпті қазірдің өзінде кейбіреулер дүйсенбі мен жұманы сәтсіз күндер деп өлердей қорқады. Мәсіх айқыш ағашқа керілген күн болғандықтан шығар, әсіресе жұма – ауыр күн болып есептеледі. Ал біздерге, сенушілерге, бұл күн ең бақытты күн емес пе? Өйткені, бұл күні бүкіл адамзатты құтқару жөніндегі ең ұлы іс атқарылды ғой. Мәсіхтің өлімі арқылы біз күнәмыздан арылып, мәңгілік өмірге жол алдық емес пе!

«13» саны да сәтсіз сандардың қатарына кіреді. Иса, ешқашан «13» санынан қорыққан емес. Үш жыл бойы Ол 12 шәкіртімен бірге жүріп, оларды үйретті, олар әрқашан 13- адам болды. Ал біздердің ырымшыл болып, 13 санынан безуіміз дұрыс бола қояр ма екен?

Сиқыршылық, көз байлаушылық

Заңдарды қайталау кітабының 18-тарауында сиқыршылар туралы айтылған. Бұлар кімдер және сол арқылы не айтылған?

Сәуегейлік пен сиқыршылықтың бірлігі мынада: екеуінде де Құдайдан теріс айналған адам Оның тыйым салғанына қарамастан, адамдарға түсініксіз жайларды білуге тырысады. Белгілі бір шамада сиқырлық адамдарға жабық аймаққа кіру болып табылады. Осы арқылы көріпкел іс немен аяқталатынын, болашақтың қандай болатынын көбірек білгісі келсе, әрекетке кіріседі. Сиқыршы сол үшін тер төгіп, билікті өз қолына алуға тырысып бағады. Ал мұның өзі Құдай еркіне қайшы келгендіктен және сиқыршының өз мүддесі үшін істелгендіктен бұл – Құдайдан берілген күш бола алмайды. Бұл – қара түнектің, шайтанның күші. Елші Пауылдың Салониқалықтарға жазған 2-хатында (2:9) бұл шайтанның әрекетіне сай зор күш-қуат, әр түрлі алдамшы ғажайып істер мен кереметтер арқылы орындалатыны айтылған.

Шайтанның күштері өзін пайдалануға қуана-қуана келіседі. Ол өзімен байланыс жасағысы келгендерге әрдайым қызмет етуге дайын. Жын-шайтандар періштелер секілді қызметші рухтар болып табылады. Құдайдың періштелері тек мәңгілік өмір иелеріне ғана жіберіледі, ал жын-шайтандар өлімге бас тіккендерге қызмет етеді. Елші Пауыл Салониқалықтарға жазған 2-хатында: “кейін құритындардың бәрін күллі жамандықтармен – тура жолдан адастырады...” деп айтылған (2:10).

Сондықтан сиқыршылық құралдары ғана емес, Құдай Өсиетіне жат әрекеттің өзі де Құдайдың алдында жексұрын қылық болып табылады, өйткені ол Құдай қаламаған іске жұмсалады. Тіпті, жақсы нәтижеге немесе жамандықты қайтаруға қол жеткеннің өзінде, бәрібір, сиқыршылық қара ниетті күштің ісі болып қала береді. Жақсылыққа жету немесе кездейсоқ бәледен сақтану үшін Құдайдың еркі керек, бұған сенім, мінәжат арқылы, яғни Құдайдың Сөзі, Құдайдың Өз Аты арқылы жетуге болады.

Кейде дана Құдай адамдарға тағдыр тауқыметін тарттырады. Мәселен, Өзіне жақындату үшін оны сырқатқа шалдықтырады. Бірақ адамдар жапа шегу арқылы құтқарылып бата алудың орнына азаптан құтылудың жолдарын іздестіреді. Құдайға бет бұрмай, шайтанның көмегіне жүгінеді. Белгілі бір себептермен Құдай бермеген нәрсені сиқыршылық арқылы алуға тырысады.

Адамға өз күнәсі үшін өкініп, Құдайға жалбарынып, өзін Құдайдың қолына беріп, жауабын сеніммен күтуден гөрі, сиқыршылықпен айналысу немесе көз байлаушыларға бару тиімді де жеңіл болып көрінеді. Ал шайтан үшін адамдардың Құдайға мойынсұнбай, Құдайға бет бұрудың орнына, оған келуі нағыз қуаныш, бұдан жын-перілер көп нәрсені ұтады. Шайтан өз қызметін ешқашан тегіннен-тегін көрсетпейді. Көп адамдар сиқыршылар шайтанды өз дегеніне күшпен көндіреді деп ойлайды. Шын мәнінде, шайтан өзінен көмек сұрағандарға қуана келісіп, өз мақсатына жетуге асығады.

Шайтанның мақсаты – адам жанын өлімге душар

ету болса, сиқыршылықтың мақсаты – адам жанына өлім мөрін басу, залал келтіру.

Бұдан қорқуымыз керек пе? Құдайға шүкір, жоқ! Егер біз Мәсіхтің қанымен жуылғанымызға нық сенсек, онда ешқандай да бөтен күш бізге зиян келтіре алмайды. Егер де біз Бақташысына бағынған қойлардай Оған мойынсұнсақ, онда арманымызға жетеміз. “Менің қойларым Менің дауысымды таниды және Мен оларды білемін, олар Менің соңымнан ереді. Мен оларға мәңгілік өмір беремін, сөйтіп олар мәңгілік өлмейтін болады және оларды Менің қолымнан ешкім тартып ала алмайды” (Жохан 10:27, 28). Мәңгілік Құдайдың қолындағы рақымдылық жартасында, Иса Мәсіхтің Қаны арқылы құтқарылған біздер сиқыршыдан да, шайтанның жын-перілерінен де қорықпауға тиіспіз.

Сиқыршылар жын-періні өзіне шақыру үшін әр түрлі арбау сөздері мен құралдарын қолданады. Шайтан болса, нұрдың періштесі кейпінде көрініп, сиқыршылыққа тәннің бәрін жақсы білетіндіктен, мұны Құдайдың Өзі жібергендей етіп көрсетеді. Сөйтіп, бал ашушыларға, сиқыршыларға, арбаушыларға күні түскендердің өзі шайтанмен шатысқандарын аңдамай қалады. Мұны саналы түрде істейтіндер сирек. Тіпті, кейде бал ашушы – сиқыршылардың өздері де жын-перінің күшімен әрекет етіп жатқандарын түсінбей, шайтанның қызметін Құдай ісі деп есептейді.

“Қара магияның” міндеті – адамдарға қаскөйлік жасау болғандықтан адамдар одан іргесін аулақ салуға тырысып бағады, бірақ мұны Құдайдың қорғауы және көмегі арқылы емес, шайтанның

араласуымен істейді. Ишаяның кітабындағы 3-тараудың 18–20-аяттарында Тәңір жүзік пен мұрын сырғаларың алып қояды делінген. Мұның бәрін сиқыршылар тұмар есебінде пайдаланады. Зергерлер сырғалар мен сақиналарға олардың иесін қара ниетті күштерден сақтайтын түрлі белгілер мен әріптерді салады.

Қазіргі таңда да жұлдызнама нұсқауымен тас таңдап алып, әшекей зат ретінде пайдалану арқылы тағдырға әсер етуге болады деп сенеді емес пе?!

Бақсы-балгерліктің, сәуегейліктің, көріпкелдіктің бәрі сиқыршылыққа жатады. Адамдар осы арқылы жақсылыққа, денсаулығын жақсартуға және т. б. жетуге тырысады. Бірақ бұған Құдай жолымен, Оған жалбарыну, күнәсін мойнына алып өкіну, мінәжат ету арқылы емес, сиқыршылықпен жетуге тырысады. Бәлекеттен Құдайдың көмегімен емес, шайтанның күші арқылы арылуды қажет етеді. Құдай тыйым салғанның бәрін ол шайтаннан алады. Сиқыршылық кезінде Киелі кітаптағы ұғымдар жиі еске алынатынына мән беруге болмайды, мәселен, Исаның есімі, Иеміз үйреткен “Көктегі Әкеміз...” Дұғамен көлегейленгенімен, мұның бәрі сиқырлау болып табылады. Лютер: «Құдайдың атын жамылып сиқыршылық жасамай, Одан именіп, Оны қастерлеуіміз керек», – деп дұрыс айтқан. Тіпті Құдайдың сөздерін айтса да, шайтанның аты шайтан. Ол мұнысын Мәсіхті шөл далада сынауы арқылы дәлелдеп берді. Філіптегі әйел қаншалықты сыпайы сөйлегенмен ол арқылы қара күштің әрекет жасағаны белгілі.

Сиқыршылық пен арбаушылықтың күшімен сауыққандардың барлығы да Құдайға бет бұрғаннан кейін тағы да ауыратын болды. Арбау кезінде қара күштің әрекет ететінін осыдан-ақ білуге болады.

Ерте замандағы сиқырлау, дуалау туралы көп айтуға болады. Бұл жөнінде Киелі кітапта көптеген мысалдар келтірілген. Сиқыршылық Мысырда, Бабылда, Грекияда кең өріс алған. Тірі Құдайдың барын және сиқыршылықтың мәнін білсе де, бұл Израил халқының арасында да кеңінен тарады. Пауыл Мәсіхті уағыздап жүрген кезінде сиқыршы Шимонмен жолығады (Ел. іс. 8:9). Елші Пауыл Патта Барешуа есімді жалған пайғамбарды кездестіреді (Ел. іс. 13:6). Пауыл ғалаттықтарға арнаған хатында (5:20) сиқыршылықты тәни нәпсілікке жатқызып: “Мұндаймен айналысқандарға Құдай Патшалығында орын жоқ”, – дейді. Жоханның Аянындағы 21-тарауда «сиқыршылар мен жалған тәңірге құлшылық етушілердің үлесі күкірт жанып тұрған отты көл болмақ... делінген (Аян 22:15).

Құдай Сөзінде салмақты ескерту болғанына карамастан, Мәсіх жолын ұстанушылар арасында да сиқыршылықты кездестіруге болады. Бұл мәселе тәңірегінде көптеген куәліктер бар. Мәселен, Жохан Златоустың былай дегені бар: “Сен бойтұмарды ғана емес, арбауды да пайдаланасың, балгер кемпірлерге баруға ұялмай, оларды үйіңе ертіп келесің. Бұл кемпірлер Мәсіх жолын ұстанушылар және Құдай атынан сөйлейді деуің сылтау бола алмайды. Өздерін Мәсіх жолын ұстанушылармыз деп атап, Құдай алдында жексұрын қылық істеп, Оның атын қорлағаны үшін мен оларды жек көремін”. Оның

бойтұмарға және басқа да қорғаныс құралдарына қарсы айтқан пікірлеріне ешкім құлақ аспады. Бойтұмарлар күні бүгінге дейін пайдаланылуда. Соғыс кезінде солдаттар жау оғы мен найзасы дарымайды деген ниетпен түрлі бойтұмарларды тағып жүргені белгілі. Көпшілігі қара ниетті рухтан қорғану мақсатымен түрлі бойтұмарлар, сырғалар тағып, сақиналар салады, ал бірақ осы арқылы шайтанның билігінде екендерінен бейхабар қалады.

Егер адам Құдай сөзіне құлақ аспаса, оны мойнына таққаннан құтқарыла ма? Құдай Сөзінің күші неде? Жазылған әріпте ме? Егер солай деп түсінсең мойныға таққаның дұрыс. Ал егер рухта деп түсінсең, онда сен оны жүрегіңе тоқисың, сол арқылы бостандық алып, аман қаласың.

Аруақтарды шақыру

Заңдарды қайталау кітабының 18-тарауының 10–12-аяттарында күнелар тізімінде “аруақтарды шақырушы” еске алынады. Бұл енді сиқырдың басқа бір ерекше саласы. Аруақтарды шақырушы адам түрлі белгілер, түтету және басқа да рәсімдердің көмегімен ауруларды сауықтырып, жын-шайтанды «қуу» үшін түрлі жалған ғажайып істер жасайды. Олар көбіне жыланды арбаумен айналысатын, бұл өнер қазір де сақталған. Өлген адамдардың аруағын шақыру арқылы болашақты болжау да көп қолданылатын. Саулдың елден бүкіл бал ашушылар мен сиқыршыларды қуып, кейіннен өзі солардан көмек сұрағаны белгілі (1Патш. 28:3–10). Манассия оларға қайтадан жүгінді (4Патш. 21:6, 2Шеж.

33:6). Жосия патша сиқыршыларды елден қуып, пұттар мен жансыз тұлғаларды қиратып, жексұрын қылықтарды жойғанымен (4Патш. 23, 24), шайтан оларды қайтадан енгізді.

Мәсіхтің тұсында ел аралап, сиқырлықты табыс көзіне айналдырып, мұнымен құпия айналысқандар көп болды. Олар өздерінің сиқыршылық өнерінің ұстазы Сүлеймен екенін, олар сиқыршылықты соның кітаптарынан үйренгендіктерін айтуды ұната-тын. Сиқыршылар Мұсаның алтыншы, жетінші кітабы деп аталатын жалған жазбаларда неше түрлі сиқырлы ішірткілерді жасаудың тәсілдері берілген. Ондайлар Құдай мен Мәриям қыздың атын жамылып жануарлар мен адам ауруларына қарсы сан қилы бақсылық қарғыстар және қасиетті жазбалардан үзінділер қосып, сайтан рухымен бәрін араластырып, адамдарды шатастырып торларына түсіреді. Мұсаның бұл кітаптарға еш қатысы болмағанындай Сүлеймен патшаның да сиқыршылыққа еш қатысы болған емес.

Өлген адамның аруағынан сұраушылар туралы тағы айтайын дегенім: әдетте олар аруақтарды сол адамның бейітінің басында шақырған. Киелі кітапта былай делінген: “Жалған тәңірлерге арналған бақтарда құрбандық шалып, кірпіш үстелдердің үстінде хош иісті заттарды да түтетеді. Олар қабыр бастарында отырып, құпия жерлерде түнеп, аруақтарға сиынады» (Ишая 65:3, 4). Аруақ шақыратындардың тілдері майда, дауыстары жер астынан шыққандай сыбырлай, мыңқылдай естіледі, сондықтан көпшілік бұларды алдамшы, өлгендердің аруақтарымен сөйлестік деп елдің басын қатырады

деп ойлайды. Өлгендердің аруақтарын шақырып, оларға сұрақтар қою – құры өтірік емес, мұны жасауға болатынын айтқым келеді. Егер өлгендердің аруақтарынан сұрау мүмкін болмаса, онда Құдай бұған тыйым салмаған болар еді.

Көпшілік адамдар мұны әлі күнге дейін алдау деп есептейді. Әрине, алдап-арбауы да мүмкін. Мұны көптеген сот процестері дәлелдеп те отыр. Мәселен, көпке белгілі Анна Рот сиқыршы емес, өтірікші болып шықты. Алайда бұдан спиритизмге (зұлым рух шақыруға) жататынның бәрі бос сөз деген ұғым тумауы керек. Демек, рухтар әлемімен тікелей байланыс бар.

Киелі кітапта спиритизмнің сеансы туралы жазылған. Абыржыған Саул патша алдағы шайқастың қалай аяқталатынын білмек болды. Бұл жайлы ол Тәңірден сұрап еді, Тәңір оның түсінде де аян бермей қойды, пайғамбарлар арқылы да жауап қатпады. Содан кейін Саул Айн-Дордағы сиқыршы әйелге барып, Самуилдің рухын шақыртады. Жерден Самуил шығып, оның ертең-ақ өлгендер патшалығында болатынын айтады.

“Самуилдың аруағы көрінді ме, әлде жоқ па?” – деген сұрақ төңірегінде әр қилы пікірлер айтылуда. Мәселен, басқа да бағушылар Лютер тәрізді Самуилдың аруағының көрінуі шайтан арқылы болған алдамшы іс, елес қана деп есептейді. Лютер өз пікірін “Құдай Самуилдың аруағын сиқыршы әйелге қозғауға жол бермейді”, – дегенге негіздейді.

Басқалары, соның ішінде, ең алдымен Сирияда 457 жылы қайтыс болған Теодорет фон Кирус өлген пайғамбар Самуилдың келуі рас, бірақ бұл

сиқыршылықтың еркімен емес, құдіретті Құдайдың әмірімен болды дегенді қуаттайды. “Әйел Самуилды көргенде қатты айқайлап жіберді”, – деген сөзден сиқыршы әйелдің таң қалып, абыржығаны аңғарылады. Сірә, ол Самуилдың келетінін өзі де күтпесе керек. Мүмкін, өзгелерге бірдеңені бықсытып, келушіні алдағысы келген де шығар, алайда Құдай Саулдың дұрыс жауап алуын қалағанға ұқсайды. Сонымен бұл оқиға бізге құпия күйінде қалды.

Шын мәнісінде не болды: Самуилдың аруағы ма немесе шайтанның елесі ме? Бұл сауал әлі де талдануда. Көптеген спиритистер (аруақтарға сенушілер) Пауылдың, Лютердің және т. б. аруақтарымен сөйлескендерін айтады. Алайда олардың сөйлескен аруақтары ауыз бармайтын дәрекі сөздер айтқандары таңқаларлық. Мәселен, елші Пауылды бір ғана нәрсе еріксіз өзіне тартқан еді – барлығынан азат болып, тек Мәсіхпен бірге болу. Ол Құдайды балаларына ұлы мұра бергені үшін дәріптей білді! Енді сондай ғажайып мұраға ие болып, даңққа бөленген оның рухы сол жайлы бөлісіп, тамсандырарлық сөздерді айтпас па? Ал спириттер “Пауыл елшінің аруағын” шақырғанда, оның аруағы ешқандай мағыналы сөздерді айтпай, қайдағы бір дәрекі сөздерді айтады.

Тауда салтанатты көрініспен Иса Мәсіхке келген Мұса мен Ілияс Оның азапты өлімі жайлы айтты. Олар Айқыштағы құрбандықтың терең мағынасын ашты. Ал спиритистер шақырған рухтар ақымақ жайттарды, болмаған оқиғаларды әңгімелейді.

Сондықтан үлкен сұрақ туындайды: шын мәнінде сол адамдардың рухтары туралы сөз болып тұр ма?

Жоқ, бұл керісінше өздерін адамдардың шақырылған рухтары етіп көрсететін жындардың әрекетінің көрінісі немесе құбылысы.

Спиритизмнің арқасында көптеген адамдар о дүниедегі өмір туралы сенімге ие болды ғой деген де маңызды уәж бар. Алайда адам өлгеннен кейін де өмірдің тоқтамайтынын спиритизмнен іздеудің қажеті жоқ. Бұған біз Құдай Сөзінің негізінде көз жеткізе аламыз. Әрине, рухты ояту үшін Құдайдың түрлі әдістерді қолдануы да ғажап емес. Мүмкін, кейде шындықты шынайы іздеушімен Құдай спириттер сеансы арқылы да адамға бір нәрсені ашатын шығар. Дегенмен, біздер Құдай Сөзін басшылыққа алып, содан таймауымыз керек. Онда былай делінген: “Сенің Құдайың, Тәңір әкелеріңе беруге Өзі ант еткен жерге сені қоныстандырған кезде, араларыңда аруақтарды шақыру деген болмауы тиісті, өйткені мұны істеген әркім Тәңір алдында жексұрын”.

Яғни, тек бұл іс қана оңбаған қылық емес, сонымен қатар оны жасаған адам да Құдай алдында жексұрын атанады. Осы сөздерді спириттер сеанстары мен мәжілістері өткізілетін үйлердің қабырғалары мен есіктеріне іліп қойса дұрыс болар еді.

Киелі кітапта былай деп жазылған: “Егер еркектер мен әйелдер өлгендердің аруағын шақырса немесе көзбояушылықпен айналысса, онда олар өлім жазасына кесіледі; олар таспен ұрылсын, олардың қаны өздерінің мойындарында” (Леуліктер 20:27).

Құдай тиым салған осы істермен айналысушылар, түгел тыңдаңдар! Бақсы-балгерлер, сиқыршылар, карта ашушылар мен сәуегейлер, құмалақ салу-

шылар сендер де құлақ салыңдар: «таспен ұрылуға және өлуге тиісті».

Құдай тек бал ашушыларды, дуалаушыларды немесе сәуегейлерді ғана емес, олармен байланыс жасағандарды, оларды бал ашуға және емделуге мәжбүр еткендерді сотқа тартады.

Киелі кітапта Құдай былай дейді: “Аруақты шақыратындарға, бақсы-балгерлер мен сиқыршыларға бармаңдар! Өйткені сендер олармен арамданасыңдар. Сендердің Құдай Иелерің Менмін” (Леуіліктер 19:31). Демек, кімде-кім бал ашушыларға немесе сиқыршыларға барса, онда олардың Құдайдан іргесін аулақ салып, қара ниетті күштен жәрдем сұрағаны. Құдай Леуіліктер 20:6-да бұдан да қатты айтады: “Балгерлер мен аруақшақырушыларға жүгінетіндерге де Мен қарсы боламын және халықтың арасынан аластатамын”.

Қымбатты оқырман, құлақ сал. Егер сен осы істермен айналысқың келсе, онда мынаны біліп қой: Құдай сенен Өз жүзін теріс бұрады. Мұның не екенін сен білесің бе, бұл – Құдай саған қамқорлық жасауды қояды, бұдан әрі саған деген игілік пен мейірбандықты доғарады, батасын бермейді деген сөз. Ол сенен дұшпан ретінде теріс қарайды және сені халқыңнан аластайды!

Осыдан кейін бұл істі зиянсыз деп кім айта алар екен? Бұл әбден сыналған Киелікітаптық емдік құрал деп айтуға бола ма? Бақсы-балгерлік пен сәуегейлік күнә деп Киелі кітап ескертсе де, бұл тым әсірелеп жібергендік деп айтуға бола ма? Жоқ, осындай жолмен адамдарды сауықтыруға тырысушылық Киелі кітаптан алынбаған. Бұл халық емі емес, ол –

күнә, сиқыршылық, Құдай алдында жексұрын қылық болып табылады. Егер сен шын жүрегіңмен тәубеге келмесең, онда ажал аранына түсетінің хақ, орның тозақ болмақ.

Уа, Жаратушы Ие, “мұндайларды жасаушы әркім Тәңір алдында жексұрын” деген сөзді әр оқырманның жүрегіне ұялата гөр.

Оккультизмнің кейбір түрлері

Құдай Сөзін оқи отырып, қара ниетті күштер әлемінің қаншалықты қорқынышты екеніне және осы бір күнәнің кеңінен тарап отырғанына біздің көзіміз жетті. Ал егер бүгінгі әлемге көз жіберсек, бұл күнәнің қазір де кең тарағаны үрей тудырады.

Сүйелді дуалау

Дуалаушылар көбінесе сүйелден арылту амалын жиі қолданады. Жеріміздің түкпір-түкпірінде мұның қалай жасалатыны туралы бірнеше мысал келтірейін. Гамбургтен келген хатта бір әйел былай деп жазды: “Менің оң қолымда көптеген сүйел бар еді. Біздің бұрынғы үй шаруасындағы әйел, егер бір күндері өлген адамның денесін жууға өзінің қолы жетсе, онда менің сүйелдерімді тазарта алатынын айтты. Шынында да, соның айтқаны бойынша ем жасап едім, сүйелден тазардым”. Дармштадтан алынған бір хатта былай делінген: “Мектепте оқып жүрген кезімде сол қолыма өте көп сүйел шыққан еді. Біз оны кетіреміз деп қаншама әрекеттенгенімізден ештеңе шықпады. Содан кейін біреулер маған бір қартаң әйелге баруға кеңес берді. Ол әйел жіп алып, ілмешек етіп түйді де беймәлім сөздерді күбірлеп, әлгі ілмешек жіппен сүйелдің әрқайсысын буды. Содан соң ол бұл жіпті біреуді жерлегенде соның моласына тастайтынын, сөйтіп, сүйелдердің із-түзсіз жоғалатынын айтты. Шынында да оның айтқаны айдай келді. Барлық сүйелдер із-түзсіз жоғалды”.

Весталиядан келген хат мынадай сыр шертеді:

“Он екі жастағы баланың екі қолына да сүйел қаптап кеткен екен. Жуырда ол маған келді, қолына қарасам, тап-таза. Сүйелдерінен қалай құтылғаны туралы сұрағанымда, бала мынаны айтты: “Көршіміздің қызы қара жіп алып, қолыңда қанша сүйел болса, сонша ілмек жасап бу, содан соң әлгі жіпті үйдің шатырынан су ағатын жерге апарып көм деп ақыл айтты. Соны жасап едім, сүйелден тазардым”.

Балалар үйінің тәрбиешісі жазған хатты оқи отырып, дуалаудың не екенін түсінетіндердің аз екенін айтуға болады. Хатты оқиық: “14 жасар ұлымның екі қолына да сүйел қаптап кеткен болатын. Оларды кетіру үшін істемеген емім қалмады. Бірде біздің қауым бағушысының шешесі балаға сүйелден құтылудың жолын жасырын үйреткен көрінеді. Жаңа ай туғанда қолын сүртіп: “Мен нені көрсем, сол өссін, нені сүртсем, сол жойылсын. Әке, Ұл және Киелі Рух”, деп айту керек екен. Бірақ бұл туралы ешкімге тісінен шығармауды тапсырған көрінеді. Баланың қолындағы сүйелдердің жоқтығын байқап қалмасам, мен бұл туралы білмес те едім. Баладан не істегенін сұрап едім, еш нәрсе айтпады. Тек арада біраз уақыт өткеннен кейін ғана ол мойындады”.

Тағы бір хатта былай деп жазылған: “Әжемнің мені неше рет үшкіріп-түшкіргенін бір Құдайдың Өзі біледі, сенуші бола тұра оның неше түрлі рецептері мұндай көп болар ма? Оның жаны да, тәні де неге соншама көп қиналғанын ол өзі де түсінбеді. (Сиқыршылық жасаймын деп белшесінен күнәға батқаны үшін ол өмірден ешқандай опа көрмеді деп айтуға болады). Әдетте, ол бәрін жаңа ай туғанда жасайды. Бірақ қазір айдың ықпалынан босай

алсам, барлық сүйелдерім мен ауруларымның қайта оралуына келіскен болар едім. Себебі жаңа ай туса болды, көңіл-күйім су сепкендей басылады, жын-перілер мені қинайды”.

Бір әйел былай деп жазды: “Өз Құтқарушымды тапқаным, міне, екі жылдан асты, бірақ рухани өсуім баяу. Мұның бәрі сиқыршылықпен айналысқанымның, басқаларды да болашағым туралы сәуегейлік айтуға мәжбүр еткенімнің кесірінен шығар деп ойлаймын”.

Осы куәландырулардан кейін қандай қорытынды шығаруға болады? Біріншіден, бұл күнәнің қаншалықты көп тарағаны айқын. Екіншіден, жұмыр жердің қай түкпірінде болса да мұны жасай алады. Үшіншіден, мұнымен айналысатын адамды байдың да, кедейдің де арасынан кездестіруге болады. Әрқашан да Құдайдың аты пайдаланылады. Осыған орай, дуалаушылардың да, бақсы-балгерге барушылардың да: “Мұнда тұрған еш сәкеттік жоқ, біз Құдайдың атын айтамыз ғой” деп шімірікпей мәлімдейтіндерін қайтерсің. Мұндай жағдайда “Көктегі Әкеміз” деген қасиетті дұға өз орнында оқылып тұрған жоқ, ол арбаудың тәсілі болып тұр. Құдай атынан айтылғанымен, астарында сиқыршылық жатыр. Қолдағы сүйелдің санына қарай ілмек жасап, содан соң жерлеу шеруі өтетін көшеге керу немесе молаға тастау, болмаса жерге көму – мұндай істер Құдай ісі бола ала ма? Ешқашан да! Оған қоса сиқыршыға барғандардың бәрі бұл жайлы үндемеуі шарт. Барлығы да ай жаңа туған кезде істеледі екен. Мұның бәрі Құдайға емес, қара ниетті күшке сенушілікті айқын көрсетеді. Егер белгісіз сөздерді айтып, осы әдістерді қолданғанда, сүйел жойылса

– бір күштің барын дәлелдейтіні сөзсіз. Егер мұның бәрі ақымақтың ісі десек, онда ешқандай әрекет те болмас еді. Бірақ қол сүйелден түп-түгел тазарады, демек, әсерлі әрекеттің болғаны. Мұнда жын-перілердің күшінің араласқаны, мұндай сырқаттарды сауықтыруға қара ниетті күштің әсері болғаны айқын. Әрине, адамдардың көпшілігі мұны біле бермейді. Алайда осының бәрін біле отырып, саналы түрде жексұрын күнәнің жетегінде кететіндер де бар.

Мен туыстарыма: «Шайтанда шынымен ауруды сауықтыра алатын күш бар, бірақ сол іспен айналысқан және өзін дуалатқан адам қасіретке қалады» деген едім, маған бәрі күлді. Үйге қонаққа келген үлкен ағам басына теміреткі түскен баласын тәуіпке апарғаны туралы айтқан еді. Сонда шешемнің: “Шайтаннан болсын, Құдайдан болсын, әйтеуір жазылса болғаны!” – деп айтқаны бар. Осыны естігенде, жүрегім шаншып, айқайлап жібергім келді.

Көптеген адамдар құны қымбат болса да, әйтеуір көмектессе болғаны деседі. Осы арқылы Құдайдың қаһарына іліге ме, немесе мойнына ауыр күнә жүгін арта ма бәрібір – онымен еш шаруалары жоқ.

Тіс ауруын және басқа ауруларды дуалап оқыту

Сүйелді қалай кетірсе, тіс ауруы мен теріскеннен де солай құтылады. Бір кішкене қыздың тісі ауырғанда, оған жаңа ай туған күні бұл ауруды айға беретініне уәде ету керектігін айтқан еді. Ол осылай істеді, содан бері оның тісі әлі бір де бір рет ауырған жоқ.

Шпандаудан бір жас жігіт былай деп жазды: “Бала кезімде көзіме жиі теріскен шығатын. Әжем

оны дуалап емдеуші еді. Кейінгі кезде емдеуді өзім де үйреніп алдым”.

Басқа бір хатта былай деп жазады: “Менің он бес айлық қызыма рахитпен ауыру қаупі төнді. Маған жұрт көп адамдарға көмегі тиген бір балгерге баруға кеңес берді. Емді айдың аяғындағы жұмада жасау керек екен. Сәбиімнің шашы мен тырнағын кесіп, бір шүберекке орап, шоқындырды да, әлгі түйінді бір жерге қойды. Содан соң мен түсінбейтін сөздерді күбірлеп айтып жатты, тек Құдайдың атын атағанын аңғарып қалдым. Төрт жасар ұлым тілме болып ауырғанда да мен оны емшіге апаруға мәжбүр болдым. Ол ай толысқан күні ауырған жерді қолымен сипап қана жазды”. Нәтижесі қандай болды? Оны біз хаттың жалғасынан білеміз: «Ұлымды жын-шайтанның айналдырғаны соншалық, түнде оны жалғыз қалдыруға қорқатын болдық. Байғұс бала жиі талмасы ұстап, соның салдарынан әбден азап тартты, қорқыныштан қалш-қалш етіп, адамдардан көмек сұрап айқайлайтын болды. Оны біреу бас салып, тұншықтыратындай болып көрінетін. Балам қиналған кезде, оған қарау аянышты еді!»

Сиқыршылықтың залалы туралы одан әрі айтайық. Осы жағдайлардың бәрінде де адам баласы қайтсе де тәннің сауығуы үшін жанталасады. Бұл Құдай еркіне үйлесімді ме, ол жағына мән берместен адамзат өз ауыртпалығынан – ауруынан айығуды ойлайды. Егер Құдай адамның ойындағысын істей қоймаса, онда адам саналы түрде ме, әлде жоқ па, әйтеуір, шайтаннан көмек сұрайды.

Адамдардың ықыласы тәни жағына көп ауытқиды,

бұл мәселені асыра бағалайды. Ал Құдай бірінші кезекте жанға қамқорлық жасайды. Оның ілімінде жан тәннен анағұрлым маңызды, сондықтан оған қамқорлық жасау – өмірдің өзінен де артығырақ болуға тиісті. Шайтан ең маңыздысы денсаулық деп алданышпен көндіреді де, адам өз тәні үшін жанын садақа етуге барады. Бұл барып тұрған ақымақтық.

«Барлық жағдайларда, Құдай Өзін сүйетіндердің игілігі үшін әрекет етеді» (Рим. 8:28), – деп жазылды емес пе? Бірақ ешкім де өз ауруына шыдамдылықпен төзгісі келмейді. Сондықтан одан қайткенде де тез емделудің амалын қарастырады. Иә, аурудың беті қайтады. Ал содан кейін күнә ауыртпалығын тарту қандай ауыр десеңші.

Дуалаушылардың үлкен табысқа жетіп отырғанына ешкім шек келтіре алмайды. Бір әйел былай деп жазады: “Сиқырлық арқылы маскүнемдіктен арылуға болатынын естігендеріңіз бар ма? Ал мен осының куәсі болдым. Маған күйеуі қатал сенуші әйелдің мекен-жайын айтты. Мен барғанда әйел үйінде жоқ екен. Күйеуі маған өте сұсты көрінді. Онысына қарамастан мен орындыққа жайғасып, үй иесін сөзге тартып, құтқарылу туралы айта бастадым. Ол болса, үн-түнсіз тыңдады. Әйел жуық арада келмегендіктен, оның маған жолығуы керек екенін айтып, күйеуіне тапсырдым. Ал әйел маған келгенде, ол да күйеуі тәрізді өңі суық адам болып көрінді. Мен одан күйеуі туралы сұрағанымда, ол бұрын қатты ішуші еді, ал қазір ішімдікті аузына алмайды дегенді айтты. Мен бір нәрсені аңғарғандай болдым. Әйел оқиғаның қалай болғанын айтты. Оған адамдарды маскүнемдіктен айықтыратын бір тәуіп кемпірге

жолығуға кеңес беріпті. Әйел соған барады. Ақша төлегеннен кейін, кемпір көрші бөлмеге кіріп кетеді. Қайта оралған ол: «енді үйіңе бара бер, күйеуің ішімдік дегенді аузына алмайтын болады» – дейді. Үйіне келсе, күйеуі төсек тартып жатыр екен. Қайта-қайта құсып, бір сөзбен айтқанда, албастының өзімен алысып жатыр екен. Ол: «Шайтанды көріп тұрсың ба? Жоқ, ол мені ала алмайды!» – дейді. Бірнеше айдан кейін күйеуі бір стақан сыра ішеді. Бұдан соң тағы да баяғы ауруы қайталайды. Содан бері күйеуі ішімдік ішуді қойыпты. Әрине, әйел мұның дұрыс еместігін және енді екеуінің де шайтанның шырмауында екенін айтты. Дегенмен өзі оған селт ете қойған жоқ. Керісінше, маскүнем күйеуінің тыныш болғанына қуанған сыңай танытты. Қандай сұмдық жалған алданыш десеңізші!” Иә, сиқыршыға барсаң көмектеседі, бірақ бұл Құдай күші емес, шайтанның өктемдігімен болған іс. Құдай маскүнемді Өз атынан Киелі Рухтың күшімен азат етеді, ал шайтан болса, бұл құрбандықты бұрынғыдан бетер шырмап ұстау үшін сиқырдың күшімен «сауықтырады». Шайтанның қулығын көрдіңіз бе. Бейшара алданған аңқау адамдар-ай!

Құтқарылу мейрамының суы және емдеудің басқа да магиялық тәсілдері

“Құтқарылу мейрамының суы” сиқыршылық істе үлкен маңыз атқарады.

Гессендегі бір елді-мекеннен біреу былай деп жазады: “Бізде Құтқарылу мейрамы күні, күн шығар алдында ағып жатқан өзеннен су алу дәстүрі бар.

Су үйге әкелінгенше сөйлесуге еш болмайды. Осындай ағын суды қыш ыдысқа құйып, жертөледе жыл бойы сақтайды. Бұл суда емдік қасиет бар деп есептейді”.

Осы хатта көптеген адамдардың өз үйлерінде өрт шықпауы үшін, сиқыршылардан үйді аластап беруін сұрағаны айтылған. Бөренелердің үстіне немесе астына арнаулы жазуы бар қағазды салса, үйге еш қауіп төнбейтін көрінеді. Мал аман болуы үшін қора-қопсыға да солай жасайды екен.

Мына бір хатқа назар аударайық: «Жақында бізде діни жиынға жиі қатысып жүретін бір әйел қайтыс болды. Ол егде тартқан адам болатын. Ол ауырып қалғанда, өзін “сепкен” көрінеді. Бұл үшін гүл өсіретін қыш құмыраға толтырып күл салады, соған тұқым егеді. Ал осыны істеген кезде не деп айту керектігі маған белгісіз. Егер тұқым өніп шықса, онда ауру құлан-таза сауығады. Оған әлдекімдер мұның күнә екенін айтқанда, ол: “Бірақ бұл маған ылғи да ем болып келген еді”, – деп жауап береді. Ол қиналып өлді. Соңғы сағатында ол тағы да сиқырланғаны туралы айтып, Құдай алдында өкінетінін білдірді. Күнәсін мойындап қанша тәубе еткенімен, ақтық деміне дейін шайтанмен арпалысумен болды. Одан “өртке қарсы хат” жоқ па деп сұрағанда, бәрін жағып жібергенін айтты. Көз жұмғаннан соң дүние-мүліктерін қарағанда, олардың арасынан сиқыршылар қолданатын құрал – “өртке қарсы хатты” сақтап қалғаны белгілі болды.

Бізде балаларды дуалаушыға апару кең етек алған. Олар алақанымен сипап, зәйтүн майын жағып, сылап-сипап, Құдай атын атап ем-дом жасайды.

Егер баланың ішек құрты болса, онда оны тәуіп кемпірге апарды. Ол бір үзім нанды алып, ауырған жерді айналдыра жүргізіп өтеді де, оны қара тауыққа жеуге береді немесе жерге көмеді.

Хаттың соңында: «Көпшілік мұның күнә екенін ойларына да алмайды», – делінген.

Ең қауіпті мәселе, адамдар осы “ізгі” кеңестерді тыңдап, шайтанның шырмауына түсіп қалатындарын ойламайды. Бір егде тартқан сенуші әңгіме үстінде былай деген еді: “Егер сен мұндай көмекті адамдарға жаның ашығандықтан істесең, бұл күнә болмайды. Ал істегеніңе ақша алсаң, күнәні арқалағаның”. Бұл жалған тұжырымға қарағанда, көмек тегін атқарылса, сиқырлыққа Тәңір еш қарсы болмайтын көрінеді. Бұдан, біз өзгені қойғанда, тіпті осы қарт уағыздаушының өзі сиқыршылықтың зымиян мақсатын байқай алмай отырғанын аңғарамыз.

Егде тартқан бір адам өз әйелі туралы былай деп жазыпты: “Әйелім қыз күнінде басы ауыра берген соң, бір “діндар” дуалаушыға қаралған екен. Балгер оның басына орамал салып, үш жерден түйін жасап, сиқырлық дұғасын оқыса керек”. Адамдардың осындай жексұрын істе Құдай атын жамылуы қандай сұмдық. Ал бас ауруынан айығамын деп, шайтанмен шатасып, өмір бойына соның жетегінде жүру қандай сұмдық өкініш десеңші.

Мен шамамен осы мазмұндас басқа да көптеген хаттар алдым. Оның әрқайсысының мазмұнын айтып шығу мүмкін емес.

«Аспан хаттары» және «отты хаттар»

“Кезінде мен “Аспан Патшалығының жеті құлпы” кітабынан алынған белгілі сиқырлы кітапша «аспан хаттары» мен «отты хаттарды» көкірегіме салып жүрдім. Бірде “аспан хатын” сырқат балаға салып көріп едім, ол бала бірден өліп кетті”

Шын мәнінде жоғарыда айтылған “Аспан Патшалығының жеті құлпы” кітабы оны бойтұмар етіп үнемі тағып жүргендерге және оған сенгендердің өмір сүруіне немесе өлуіне көмектеседі деп ойлайтындарға жұмақтың есігін мәңгі жабатын құлып болып табылады.

Мұсаның 6, 7-кітаптары

“Аспанның жеті құлпы” секілді қара ниетті кітаптар қатарына басында айтып кеткен “Мұсаның 6, 7-кітабы” деген кітаптар да жатады. Бұл кітаптардың Мұсаға ешқандай қатысы жоқ. Ол дұшпанның ойлап тапқан айласы. Бұл – кітапқа Мұсаның атын бере отырып, осы арқылы талай жандарды өзінің құрсауына тартудың амалы.

Маған келген хаттардың бірінде: “Оқушы кезімде шешем үнемі жабырқаңқы жүретін, оның еңсесін күйініш рухы басқанын сезінуші едім. Ол уақытта мен Мәсіхтің Құрбандық Қанының күшін білмейтінмін, сондықтан шешем тіршіліктің қамынан босаса, көңілі орнығар ма екен деген ой болды. Біздің үйімізде “Мұсаның 6, 7-кітабы” бар еді. Мен оны көп мәрте оқыдым. Әрине, көбі ұмыт болды, бірақ бір оқиға әлі күнге дейін есімде, сол менің мазамды кетіруде.

Мен өзіме беймәлім бір тілдегі дуаны өз қаныммен көшіріп жаздым. Сол қағазды басыма жастанып, түсімде бақытты лотерея билетінің нөмірін көруді қаладым. Осы кітаптан тағы бір сөйлемді балауызға жаздым да, ауруынан айықсын деген ниетпен шешемнің мойнына іліп қойдым. Мұның арты сұмдық болды. Шешем бірнеше рет өзін-өзі өлтіргісі келіп, ақырында сұмдық қорқыныш билеген күйі о дүниеге аттанды”.

Мекленбургтен бір ер адам былай деп жазады: «Мен соғыста жүргенімде, әйелім тілме ауруына шалдыққан баламды сиқыршыға оқытқан көрінеді. Бұрын әйелім Құдайға сенетін еді. Дуа оқытқаннан кейін мүлдем өзгеріп кетті, ұлым екеуі сенушілерді жауларындай жек көретін болды. Мені де қатты жек көріп, қалай болғанда да қаралауға тырысатын. Бұрнағы кездері ол сенушілердің жиналыстарына баратын, ал қазір оны мүлде ұмытқан. Бірде қауым бақташысы үйімізге келгенде, әйелім қатты ашуланып, оны үйден қуып шықты.

Біз бұдан сиқыршылықтың ауыр зардабын байқаймыз» Осы мысалдардан және куәлердің сөздерінен мынаны аңғарамыз: мұның бәрі әлдекімдер ойлайтындай зиянсыз істер емес, бұлардың Құдаймен немесе Киелі кітаппен ешқандай қатысы жоқ. Тағы да бірнеше мысал келтірейін:

Соғыстан жүйке ауруына шалдығып оралған бір жас жігітке таныстары бұл ауруынан айығу үшін балгерге баруға кеңес береді. Ол қатарынан үш жексенбі сайын алхоры ағашын құшақтап: “Тас ағаш, мені мазалап жүрген бойымдағы дертті саған айтып тұрмын. Бірінші ұшып кеткен құс менің ауруымды

алып кетсін. Әке, Ұл және Киелі Рух атынан”, – деп айтуға тиісті болды.

Померанияның бір елді мекенінен мынандай хат келді: “Сиқыршылық пен дуалаудың салдарынан мұндағылардың көбісі шайтанның шырмауында жүр. Бізде сұмдық істер болып тұрады. Сиқыршылық дегеніңіз өріс алып барады. Адамдар бақсы-балгерге көбіне өздері барады, кейде оларды үйлеріне шақырып алады. Бүкіл елді мекен жын-шайтанмен байланыста деп айтуға болады”.

Мүмкін, кейбіреулердің бұған сенбей, басқаша ойлауы да ғажап емес. Мысалы мына бір әйелдің жазған хатындағыдай: “Адамдардың бақсы-балгерлерге барғанын неліктен үлкен күнә деп санайтындарыңызға мен түсінбеймін. Қазір мұның әдетке айналғаны соншалық, оны күнә деп санайтындар саусақпен санарлық қана. Өз басым болса, картамен, құмалақпен бал ашуды, сиқырлауды мойындамаймын, бірақ, ертеде дуагерге барғаным бар. Мұндай істермен негізінен мейірімді, қарт адамдар айналысады. Олар ешқандай талап қоймайды, қанша берсең, соны қанағат етеді. Өйткені, Киелі кітапта да былай делінген ғой: “Оның үстіне қолдарын жайып сиынсын... Иеміз сауықтырмақ...” Дәрігер жаза алмаған ауруды емшінің бірден анықтап, айықтырғаны туралы да білеміз”.

Осы келтірілген куәліктерден кейін, адамдарды алдаумен шырмауына түсірген қара түнек күштің ықпалы бар екені айқын көрініп тұрған жоқ па?

Сиқыршылықтың салдары

Сиқыршылықтың салдары (зардабы) түрліше болуы мүмкін. Онымен айналысқандардың өздері не дейтінін оқып көріңіздер.

Сиынганда қуаныштың болмауы

“Сиқыршылықтың салдарынан мен шайтанның шырмауына әбден түстім, содан қазір тәнім де, жаным да қиналуда. Мені өзімді-өзім өлтірсем деген ой меңдеп алды. Бұл ойдан қалай болғанда да құтылғым келеді. Мен нағыз бақытсыз жанмын, тіпті, мінәжат етуге дәрменім жоқ, жан-дүнием қараңғы қапаста. Құдайға, Құтқарушыма жан-тәніммен құлшылық етер едім, Онсыз менің өмірім сүреңсіз және құлазыған бос екенін сезінемін...” Бұдан әрі бұл бейшара адам дұға жасаушыларға дұғай сәлем жолдап, осы қара түнектен құтылуына көмектесу үшін ол туралы Құдайға Иса Мәсіхтің атынан сиынуымызды өтінеді.

Екінші хатты оқиық: “Киелі кітаптан оқығанымды табан астында ұмытып қаламын. Сондай-ақ, жиналыста айтылған сөздер де жүректі селт еткізбейді, жадымда қалатындары шамалы. Бірақ мен Құдай Сөзін есіме сақтап, жүрегіме қабылдауға тырысып-ақбағудамын. Шіркін, бала кезімдегі сенімім қайта оралса ғой! Ол ойым неліктен орындалмайды дейсіз бе? Себебі неде? Мүмкін, бұл менің бұрын сиқыршыларға ісім түскенінен және содан кейін өзімнің де сиқырлықпен айналысқанымнан болар...”

Вестфалиядан келген хатта біреу былайша

шағымданады: “Осыдан жиырма жыл бұрын өте қатты ауырған едім, таныстарым маған емшіге баруға кеңес берді. Мен солай еттім де. Сол кездегі жасаған күнәм Құдайға құлшылық етуіме кедергі келтіргенін бүгін де сезініп жүрмін. Дұға етіп отырғанда “дұғадан келер пайда жоқ-ау осы” деген күмәнді ойдың мазалайтыны да бар. Мені осындай қырсық ойлар мазалап, жиі азапқа салуда”.

Құдай Сөзін түсіне алмаудың және Киелі Жазбаны үйреніп, есте сақтауға ықылас жоқтығының себебі сиқыршыға тәуелді болудың салдары екені айдан анық болып отыр. Шайтанның жанды шырмағаны соншалық, жүректе Құдай Сөзі енетін саңылау да қалмаған. Сондықтан да Құдай Сөзі түсініксіз болып қала беруде.

Құдай Сөзінен келетін батаны ұрлайтын зымиян ойлар жиі келеді. Бұлар – Құдайды балағаттайтын қырсық ойлар.

Жан тыныштығының жоқтығы

Вюртембергтен бір әйел былай деп жазады: “Жантыныштық деген мүлдем жоғалды. Менің күнәларымды кешіре гөр деп Құдайға жиі құлшылық етіп, өз-өзіме Құдаймен татуласпай тұрып төсекке жатпаймын деп күнде қайталаймын. Талай түндерді жылап-сықтаумен өткіздім. Әлсірегенім соншалық, тіпті ойлануға да шамам жоқ. Құтқарушымның күнәмді кешіргеніне сенейін десем, еңсемді бір зіл батпан салмақ басып, өктемдік етіп тұрғандай күй кешудемін. Ақыл бөлісетін бір адам кездессе деп жиі ойлаймын. Қолдарым мен аяқтарым да ауыр

жүк басқандай, күнәларым күні-түні көзіме елестеп тұрады. Шіркін, Тәңірімнің жүрегі жібіп, мені аяса ғой. Менің ойларым сұмдық, олардан арылайын десем, олар маған бәрібір қайта-қайта келе береді. Құдайға жақындауға талпынған сайын бұл ойлар маған бұрынғыдан бетер беймазалық әкелуде. Өзен, көлдің жанынан өтіп бара жатсам: “Суға секір, сонда тыныштық табасың”, – деген дауысты естігендей боламын. Пышақты көрсем, «кеңірдегіңді қиып жібер», – деп тұрғандай болып көрінеді де тұрады. Міне, осылайша сайтанның сапалағы күні-түні қыр соңымнан қалар емес. Өлең тыңдай алмаймын, тыңдасам болды, жылай беремін. Сосын: «Саған қуануға да, өлең айтуға да болмайды. Өзіңді-өзің өлтір, сонда ғана тыныштық аласың» деген дауысты естимін. “Өткен жылы демікпемен ауырып едім, біреулер емші әйелге барсаң айығасың деген кеңес берді. Кішкентай кезімде шешемнің мені де емшіге жұмсағаны бар, келесі жолы өз баламды алып бардым. Егер Тәңір маған мейірін түсіріп, қорқынышты ойлардан азат етсе ғой, шіркін...” Міне, енді соның бәрінің салдары шығар, өзімді-өзім өлтіру туралы ой басыма әбден ұялап алды”.

Өзін-өзі өлтіру туралы ойлар

Бұндай сұмдық ойлар бақсы-балгерлерге, емші-домшыларға, сәуегейлерге жүгінгеннің салдары болып табылады. Өздеріңіз байқаған боларсыздар, бұл ойлар өзін-өзі өлтіруге немесе Құдайға тіл тигізуге кеңес береді. Кей адамдар тоғайға жоламайды, бара қалса, бір дауыс: “Кел, мына ағашқа асыл, сонда бәрі

аяқталады”, – деп сыбырлап шақырғандай болады. Олар темір жол маңына бара алмайды, өйткені бір дауыс оларға пойыздың астына түс деп сыбырлайды. Шайтан осындай сұмдық ойлар арқылы мақсатына жиі жетіп те жүр. Мұндай ойлардан құтылу үшін адамдар өздеріне-өздері қол жұмсайды.

Қырсық ойлар

Кейбір адамдарды қырсық ойлар билеп алады. Әдетте, бұл ойлар Құдайға, Құтқарушыға және Киелі Рухқа қарсы бағытталады. Шайтан түрлі кертартпа сөздерді пайдаланып, оларды адамдардың есіне салады, ал содан соң одан құтылудың өзі екіталай. Мұндай оймен уланғандар: «Жаман ойларды мен ойлаймын деп ойламаймын, олар менің жүрегімнен шығып жатқан жоқ, сырттан келеді» – деп ақталады. Біреу құлағыңа сыбырлаған осындай ойлардан Құдайым әркез сақтасын. Әдетте, бұл ойлар адам мінезін еткенде, Құдайға жалбарынғанда, Киелі кітапты оқығанда немесе қауымда Құдай Сөзін көңіл қоя тыңдағанда келеді. Шайтан осы ойлар арқылы көптеген адамдардың жүрегіне енеді, сөйтіп, олар жиналысқа баруды доғарады, Құдай Сөзін оқымай қояды, қырсық ой туындамас үшін мінезін етуден де бас тартады. Сөйтіп, Құдай балаларын бір-бірлерінен алыстатып, Құдайдан бездіріп, дұшпан өз дегеніне жетеді. Адам тірі Құдаймен сөйлесуді қойып, төмен құлдилаытыны соншалық, тіпті бара-бара ол қара ниетті күштің қолындағы ойыншыққа айналады. Бұл қырсық ойлар сиқыршыға ден қоюдың зардабы. Егер кімде-кімді осындай ойлар мазаласа, онда

оның сиқыршыға барғанын, осы арқылы шайтанның шырмауына түскенін айна-қатесіз тануға болады.

Құдайдың Сөзін түсінбеушілік

Дуалаушыға барғаннан кейін, адамдар Құдай Сөзін түсіну қабілетінен айырылады. Бір кездерде сиқыршыға барған бір әйел былай деп жазады: “Шамамен бір жылдай уақыт болды, шайтанның шырмауынан шығу ниетімен тұрақты түрде Құдайға құлшылық етемін, бірақ ісімнің оңға басар түрі жоқ. Бұл туралы көп жазуға да болар еді, алайда мен мынаны ғана айтсам деймін: Құдай Сөзі бойынша өмір сүру туралы шешімге келген мезгілден бері басым жиі ауыратын болды. Көз алдымда әрқашан көлеңкелер көлбеңдейді. Шайтан Құдайға қарсы ойларды жиі жібереді, ал мен оны қууға күш салып-ақ бағамын, бірақ дәрменсізбін. Шешемнен мұның неліктен екенін сұрағанымда, ол бала кезімде мені дуалаушыға жиі апарғанын айтты”.

Тағы бір әйел былайша шағым жасайды: “Менің ештеңеден тайынғым келмейтін кездерім жиі болып тұрады. Табыссыз талпыныстардан соң өмір сүргің келмейді екен. Айқыш ағашқа керілген Исаны сеніммен көз алдыма елестетсем, күнәларым үшін Оған әлі де борышты екенімді айқыш ағаш ойыма салады. Исаның мен үшін де шегеленгені мені одан бетер қинайды. Ертеректе мен бал ашумен жиі айналысушы едім. Енді сол қылықтарым үшін балам азабын тартып жүр, өйткені оның жүйкесі әбден жұқарып бітті. Өткен жылы мен Құдайға қатты реніш айттым. Сонда түсіме Мәсіх кіріп: “өткеннің

бәрін ұмытып, Менің еркіме мүлдем берілуге көнесің бе?” – деп сұрады. Мен қасарысып: “Жоқ!” – деп жауап бердім. Осы “жоқ” деген сөзім мені күні бүгінге дейін қинап жүр. Мүмкін, осы “жоқ” деген сөз – менің күйінішімнің себебі шығар. Егер Тәңірдің өзі маған тезірек көмекке келмесе, өзімді-өзім өлтіріп, мәңгілікке құритынымды сеземін. Күресуге дәрмен жоқ, ниетім де жоқ, өйткені шаршадым. Қиындықты шектен тыс көп көрдім”.

Өлім туралы ойлар

Келген хаттардың бірінде көп жылдар бойы біреуді улап өлтіргісі келетін ойдан арыла алмай жүрген әйел үшін мінәжат етуді өтініпті. Әлгі әйел апта сайын жындыханаға барып, көз байлау сеансына қатысады екен. Дәрігердің сырқаттың себебін білуге жасаған қадамдары нәтиже бермей-ақ қойды. Байғұс әйел адамдардың көзіне түсуге жүрексінеді, өйткені, біреуге у беріп өлтіріп қоятын секілді болады да тұрады. Бірде осы сырқаттың сыры туралы әңгімелескенде, әйелдің жас кезінде балгерге барғаны белгілі болды. Ол оның бетіндегі күйігін жазуға көмектескен көрінеді. Бірақ мұнда жаман ештеңе жоқтығын, бұған сенбегенін және сол кезде онымен сенуші әйелдің бірге болғанын айтады. Оның осындай ауруға шалдығуының себебі сиқыршылықтың салдары екенін оған түсіндіру еш нәтиже бермеді.

Мұнда тұрған ештеңе жоқ деп адамды иландыру шайтанның айласы. Егер адамдар мұны біліп қалып, тәубе етсе, шайтан биліктен айрылар еді.

Қаншама көлгірсігенімен, оның себебі осында. Дуалаушыға барғандардың тағдырының ақыры немен тамамдалатынын көре отырып, адамның өзі барып шайтанның шырмауына түседі, ал сосын одан құтылу оңайға түспейді.

Шайтанмен шатасқанның күні қараң: “Дұшпан менің жүрегіме кіріп алып, оны улап жіберді. Енді менің жүрегімді сенімсіздік жайлап, қуанышты сенімге ие болудан қалып барамын. Исаның күшімен сауығуға тырыссам, шайтан бар амалын қарастырып, көзімді жоюға жанталасып бағуда. Өз бөлмеді жын жайлап алғанын сеземін, олар менің тәнім мен жанымды азапқа салады. Түн баласы бойымды үрей билеп, жын-шайтан мені мәңгілік өлімге алып кететіндей болады да тұрады. Осы бір сұмдық қиналыстан тез арада арылсам ғой, шіркін! Тілегім тозақ азабынан қалай да құтылу. Тәңірімнің: “әрбір ағаштың түбінде балта жатыр; жеміс бермейтін әрбір ағаш кесіліп, отқа тасталады...” деген сөздері ойға келеді. Мен қазір-ақ осы оттың ортасында тұрмын, алайда одан құтылсам деген ықылас-ынтам зор”.

Бақсы-балгерлікпен айналысып жүргендер өздерін болашақта қандай сұмдық азаптың күтіп тұрғанын, қолына түскендерді шайтанның қалай қорлайтынын ұғынса, олар сақтанар еді.

Мына хатта жантүршігерлік жайттар баяндалған: “Мен қапылыста азғырушының қолына түсіп қалып отырмын, ал ол болса, өз шеңгелінен шығарар емес. Құдайдың атын атап, Одан көмек сұрайын деп тұрып, қайдан аузыма түскенін қайдам: “Сүйікті шайтан, мені құтқар, маған көмектес”, – деп қалдым. Содан бері шайтанның шырмауындамын. Менің жас өмірім

өксікке толы деп айтуыма болады. Қара күштер, Құдайға қарсы келетін ойлар көкейімнен кетпейді! Барлық сиыну мен өтініштерге қарамастан, қара ниетті күштер мені жіберер емес. Көңілім жабырқап, бір сәт селт етпейді, уайым күні-түні иектеп, еңсемді көтертпей-ақ қойды. «Олар оны Тоқтының қанымен жеңді» деген сөздер маған арналмаған. Тоқтының Қаны мені жуып, Киелі Рух жанымды ешқашан жадыратпайды. Күні бойы мақсатсыз күн кешемін, жаным күйзелісте, денем дел-сал. Оған қоса, осы бір қырсықтың салдарынан Құдайға қарсы ойлар бас көтереді. Жүректі жексұрын қара түнек билеп алған. Осы ауыр қапастан шығудың жолы қайсы? Жүрегім пәк болып, бүкіл жан-тәніммен Тәңірге қызмет етсем, Соның айтқанымен жүрсем деймін. Менің бір ғана тілегім осы”.

Сиқыршылықты, бақсы-балгерлікті зиянсыз іс деп есептейтіндер, ауруынан сауығу үшін шайтанның күшіне жүгінетіндер, бәріңіз мұны құлақтарыңызға құйып алыңыздар! Шайтан – қатігез билеп-төстеуші. Алғашында ол аңқау адамдарды алдап торына түсіреді. Бұл Құдайдың ісі, өйткені мінәжат етіліп, Құдайдың атымен істеледі деп сендірмек болады. Тек содан соң ғана ашықтан-ашық келемеждеп: “Сенің күнәң кешірілмейді. Одан да жіпті алып, буынып өл”, – деп өзеурейді.

Кезінде шайтанның өзәзіл сөзіне ерген адамдар, құлшына тәубеге келіп, Құдай сендердің күнәларыңның тұзағын үзуі үшін сиыныңдар! Құдайға шүкір, Оның тұзақ атаулының бәрін үзуге шамасы келеді!

Енді болашақты болжаушылардың, қартамен,

құмалақпен бал ашушылардың, аруақ шақырушылардың әрекеттерінің арты неге апарып соғар екен, соны қарастырайық.

Картамен бал ашу және оның зардабы

Осы мәселе туралы бірнеше хаттан мысал келтірелік: “Бала кезімде әкем маған дуа оқыды. Мен “Мұсаның 6, 7-кітаптарын” оқып, сиқырлау жөніндегі дуаларды көшіріп алдым. Шешем де шайтанның қармағына ілініп, қатты қиналып өлді. Шешем өлгеннен кейін, мен сары уайымға салындым. Ешкім де, ештеңе де менің көңілімді жадырата алмады. Ішкі дауыс «Өлі болсам ғой!» – деп мазалай берді. Әйтеуір Құдайдың шапағаты мені сақтап, Соның мейірімі ғана мені мәңгілік ажал тырнағынан арашалап қалды. Сол кездері мен бал ашушыларға жиі баратынмын, “аспан хаты” дегенді ұзақ уақыт бойымда сақтап, күнәнің терең қараңғы тұңғиығына баттым.

Осыдан екі жыл бұрын мен Тәңірге қызмет етуге біржола бекіндім. Күнәнің батпағынан шығып, жарық дүниеге ұмтылдым. Қазір де Иса Мәсіхтің меншігіне айналғаным сенемін, дегенмен толық қуаныш құшағындамын деп айта алмаймын, құтқарылғаным сенімім жетіспейді. Үнемі біреудің қысымында жүргендей боламын. Құдайға құлшылық ету жиындарына бару, Киелі кітапты оқу, мінәжат ету мен үшін міндет секілді, бірақ ішкі ұмтылыс байқалмайды. Толық құтқарылуды қалаймын-ақ, бірақ дәрменсізбін”.

Мұнда ілгері басқан аяқты кері кетіретін бір

өктемдік бар сияқты, алайда Құдайға шүкір, Иса барлық түйінді біртіндеп Өзі шешуде.

Берлиннен бір қыз былай деп жазыпты: “Мен Құдайға деген сүйіспеншіліктен емес, қорыққаны-мнан құлшылық ететінімді мойындауға тиістімін. Оның әділ соты туралы ойлағанымда денем түршігіп кетеді. Еврейлерге арналған хаттың 10-тарауының 31-аятындағы: “Тірі Құдайдың қолына түсу қандай қорқынышты!” – деген сөздер есіме түссе, бойымды үрей билейді. Құдайға бұлай қарағаннан гөрі, сенімнен толық безіп кету артық деп ойлаймын, сонда сен Құдай туралы ештеңе білмейсің. Мен өмірімді Исаға толық арнау үшін, «ауырып қалмаймын ба және бұл қашан болады», деп алдымен бал ашушыға бардым. Өйткені менің жүрегім тыныштықты көксейді.

Шайтанның «шеберлігі» қандай! Адам өзін Құдайға арнауды қалайды, ал сол кезде шайтан бұған қай уақыт қолайлы екенін біліп алу үшін балгерге жұмсайды. Осылайша, шайтан адамды Құдайға қызмет ету мүмкіншілігінен айырады, сөйтіп адамның өмірі албастының қолындағы ойыншыққа айналады. Шайтанның қулығына құрық бойламайды дейтініміз де сондықтан.

Тағы бір хатты оқиық: “Күйеуімнің әке-шешесі ертеректе бір сенуші отбасымен араласып тұрушы еді. Олар аяқ астынан бізбен араласуды қойды. Қайын енем картамен бал аша алатын және мұнымен үнемі айналысатын. Содан менің күйеуім студент кезінде Құдайдың құдіретімен Мәсіхші студенттердің одағы арқылы Тәңірге сенгенде, қайын енем жындануға дейін жетті. Ол ұлының Исаға

сенгіштігі оны жақсылыққа апармайтынын айтты. Менің күйеуім бұл одақтан шығу керектігі туралы шешесінің айтқанына көнбеген соң, ол оны өзінің қас дұшпанындай көрді. Ұлының өтінішімен ол кейде Киелі кітапты оқыды, тіпті ендігәрі бал ашпауға уәде берді, бірақ арада жарты сағат өтпей-ақ бұл үшін бұлқан-талқан болатын. Тіпті бір күні ол өзін өлтірмек те болды.

Енді енем Мәсіх жолын ұстанушылар жолынан толықтай шығып, спириттерге баратын болды. Қайын атамның айтуы бойынша, бізден хат келген кезде оның мазмұнына қарамастан енем долданып ашуланатын көрінеді. Тіпті, түні бойы жылап, жүрегінің ұстамасы ұстап қалады екен. Кейде ол бізге жүрек тебіренерлік хат жазады, ал кей кездері ешбір себепсіз, зәрін төккен хат аламыз. Тәңір бізге әсіресе оң көзімен қараған сәтте, қайын енемнен зәрлі хаттар келеді. Ол Құдайдың бізді жебегенін толықтай білмесе де, сезінетін болса керек. Бірде ол бізді қойып, бала-шағамызға дейін қарғады. Содан соң тәубесіне келіп, қарғыстарын қайтарып алды. Біздің келісімімізсіз болашағымыздың қандай болатынын білмек те болды. Күйеуім оның мұндай әрекеттеріне тыйым салған еді, онысын қойды ма, қоймады ма, ол жағынан бейхабармыз”.

Міне, көрдіңіздер ғой, шайтанның азғыруына ерген ана өз балаларын қарғап-сілеуге дейін барады! Мұны сұмдық демей не дейміз? Мәсіхтің жолын ұстануға нық шешім жасаған ұлы мен оның әйелінің бір ниетте болғанына қуанудың орнына, шешесі оларды өлердей жек көреді.

Картамен бал ашушыға ісі түскеннен кейін,

адамдар Құдайды қанша іздесе де жан тыныштығын ала алмайды. Бір әйел былай деп жазды: “Мен шын жүректен тәубеге келдім, бірақ толық құтқарылғанымасенімім аз, жүрегімде маза жоқ. Ертеректе сиқыршыларға барып, талай рет карта аштырып едім. “Қалай азат болам?” деген кітапшаны да оқып шықтым, бірақ еш нәрсе көмектесер емес. Шіркін-ай, Құдай перзенті болу қуанышына кенелсем ғой! Сол арман жолында төккен көз жасым мен мінәжаттарым нәтиже бере қойған жоқ. Шіркін, еркіндік алып, сол қуанышты басқалармен бөліссем ғой!”

Адам жанының Исаға келіп, күнәлары кешірілгенімен, жаны тыныштығын таппауы қандай қорқынышты. Шайтан: “Сенің тәубе етіп, Құдай перзенті болғың келген екен. Оған жібере қоймаспын! Сен менікісің, сондықтан мен саған билік жүргіземін!” – деп тұрғандай. Шайтанның шырмауынан босап шығып, жан тыныштығын табу үшін сол адам да, басқалар да үздіксіз Иса Мәсіх атынан мінәжат етуі қажет. Ал шайтанның сөзіне, еркіне ергендердің жаны ғана емес, тәні де шырмауда, қол-аяғына кісен салынғанмен пара-пар. Сөйтіп ол алдымен адамға алтыннан тау тұрғызып беремін деп уәде етеді де, артынан тақырға отырғызып, өзінің өтіріктің әкесі екендігін көрсетеді.

Бір бейшара жесір әйел былай деп жазады: “Міне, жиырма жеті жылдан бері айықпайтын ауруға шалдықтым. Бұл бір кездегі сиқыршылықтың салдары деп ойлаймын. Сырқат алғаш жабысқанда, мен жиырма алтыда едім, қазір елу үштемін. Жиырма жеті жылдан бері шайтан тәнімді, жанымды және

рухымды азапқа салуда. Мектепте оқып жүргенімде Киелі кітапты оқуды ұнатып, Құдай жолына түсуге талпынушы едім. Киелі кітаптан көптеген аяттар мен әңгімелерді білетінмін. Бірақ, өкінішке орай, сол кезде мен көп жылдар бойы жүрегімді шайтанға бердім. Қай жерге бармайын, ол мені қорқытып-үркітіп, қинайтын болды. Осы жылдардың ішінде менің үлесім үрей мен күйзеліс. Кей кездері есімнен айырылып қалмасам игі еді деп те қорқамын. Оның үстіне тәнім де дертке шалдыққан. Құдайға қарсылық білдіріп, тіл тигізетін ойлар қатты қинайды. Өзім жатқа білетін Киелі кітаптағы дұғаларды айтып, қорғанып та көрдім, өзгелердің де мен үшін мінәжат етулерін өтіндім. Бірақ осы уақытқа дейін ешбір әсері тимей-ақ келеді. Өзімді буып тастаған шайтанның шырмауынан Құдайдың мені босататынына кәміл сенемін. Өйткені Оның ондай билігі бар, бірақ сол сәт қашан болар екен?"

Бүкіл өмірдің шайтан шырмауында өтуі қандай өкінішті! Егер өмірімізді Тәңірге сеніп тапсырсақ, Ол біздің игі Бақташымыз болса, онда өмір ағысы да басқаша болады ғой. Сонда біз де Дәуіттің 22-жырында қуанышпен айтқанындай айта алар едік: "Жаратқан Ием – менің Бағушым, мен еш нәрседен де тарықпаймын. Ол мені жасыл жайлауға жаяды, тұнық суға жетелеп апарады. Тәңірім жаныма күш дарытады, есімі "Қасиетті" болғандықтан. Мен сенімімді артамын да Оған: Ол мені тура жолмен жетелейді". Жырда: "Тәңірім жаныма күш дарытады", делінген, ал әйелдің хатынан: "Шайтан менің жанымды қинап қорқытады", деген сөздерді оқимыз.

Екеуінің айырмашылығы жер мен көктей екенін байқадыңыз ба? Мұның бәрі бақсы-балгерлікпен айналысатындарға үлкен ескерту!

Балтық жағалауынан бір бауырымыз былай деп жазады: “Бізде де сиқыршылық күнәсіне белшесінен батқандар көп. Олар мұның Тәңір алдында жексұрын күнә екенінен бейхабар. Жақында өзін нағыз сенушімін деп есептейтін, қауым бақташысымен бірге Киелі кітапты талқылап, жиындарда болатын, сонда да Исамен қарым-қатынасында нақтылық жоқ, жан-дүниесінде тыныштық жоқ бір әйелмен сұхбаттасуға тура келді. Әйелмен сөйлескенімізде, ол бұрын сиқыршыға барған болып шықты”.

Сиқыршылықтың қырсығын адам өзі ғана арқалап қоймайды, оның кесірі алыс-жақын туыстарына да тиеді. «Менің қайын енем картамен бал ашып, түрлі «аспан хаттарымен» айналысқан еді. Осы бір кесапатқа оның өзі ғана емес, мен де, менің әйелім және жақындары да душар болды. Ең қорқыныштысы, олардың Құдай туралы бір анық түсінігі болмауында. Олар бір жиыннан екінші жиынға барды, бірақ бұдан ешқандай нәтиже шықпады». Қандай қорқынышты қарғыс десеңші, шын жүректерімен ақиқатты іздесе де, оны таба алар емес. Оны күнә деп шын жүректен тәубеге келмесе, сиқыршылықтың күнәсі көздерін байлап, жандарын жаралайды. “Менің апайым картамен бал ашудың, түрлі қара ниетті істердің құлы. Ол арақ пен темекі жоқ болса, дірілдеп кетеді. Сол себептен оның ұлы мен келіні де шайтанның жетегінде кеткен». Сиқыршылық сұмдықтың бәрін жасайды. «Менің ағам магнетизммен айналысады. Мұның не сөз екенін қайдан білейін, әйтеуір оның:

“Дұға көмектеспейді” деген сөзін оқығанда, анық түсінгенім: яғни ағамның Құдай Сөзі туралы ештеңе білгісі келмейді, бұл оның хаттарынан сезіліп тұр”.

Келесі хатты оқиық: “Менің көршім, егде тартқан әйел, бал ашумен айналысады. Оны алдағыны айтып беретін көріпкелдігі бар деп айтатын. Менің шешем сенуші әжеммен бірге шынайы Көмекшіге барудың орнына, осы көрші әйелге барып, оны жексенбіде үйге шақыратын болды. Әжем оған біздің табалдырығымызды аттауына тыйым салуды өтінді. Алты жасымда демікпе ауруына шалдықтым. Бойжете бастаған кезімде, шешем бал ашушыға барып, менің күйеуге қашан шығатыным туралы білмек болды. Мен он бес жасқа толғанда әжем өліп, мінәжаттың күні сонымен бірге кетті де, үйімізді шайтан жайлап алды. Ең ақыр аяғында мені де бал ашушыға баруға көндірді. Мен мұнда тұрған ештеңе жоқ, бір күнәнің әрісі не, берісі не деп, бал ашушыға бардым. Ол өткенімді түгел және болашағымның бір бөлігі туралы айтты да, кенеттен әңгімесін үзіп: “Біреу көз алдымда бір жапырақ қағаз ұстап тұрғандай, одан арғыны көре алатын емеспін, енді еш нәрсе де айта алмаймын”, – деді. Кейін ол менің тәубеге келгеніме дейінгінің бәрін дұрыс айтып бергеніне көзім жетті. Соған дейін өзімнің шайтанның шырмауында болғанымды білдім. Мен оған барғаннан кейін, бірнеше күннен соң әлгі әйел басқыштан құлап, мойнын үзіп алды деп естідім. Мені қорқыныш тұмшалап алды. Ақылымнан алжаспасам жарар еді деген үрей пайда болды. Біздің отбасымыз бытырап кетті. Шешем мен ағам Америкаға кетті. Мен де сол жаққа бардым, бірақ көп кешікпей қайтып

оралдым. Менің жағдайым сұмдық болды. Мінәжат ете бастасам-ақ қызуым көтеріліп, ауа жетпей деміге бастаймын. Мен бұдан қатты қорқам, себебі өзімді ауыр сезінемін. Әпкемнің басында да түсініксіз жағдайлар болып тұрады... Ол кей кезде ақылынан адасқандай болады, одан әрі не болары белгісіз...”

Міне, бұл күнәнің көптеген отбасын және олардың ұрпақтарын қандай бақытсыздыққа соқтыратынын көріп отырсыздар ма? Үрей мен торығушылыққа толы тағы бір хаттан мысал келтіріп, бұл тақырыпты осымен тәмамдаймын. Бал ашу, сиқыршылық және т. б. арқылы әркімнің шайтанмен байланысатынын түсінікті шығар деп ойлаймын.

“Жүйке тамыр жүйесінің шайқалғаны соншалық, есімнен адасатын шығармын деп ойлады. Бала кезімде жиі ауыра бергендіктен, шешем мені шипасы болар ма екен деген оймен емшілерге апарғанын білемін. Мен онымен осы туралы шындап сөйлесіп едім, шешем мұның күнә екенін растады. Бірақ ол менің науқасыма немқұрайды қарайды, тек менің азабымды көрген кезде ғана байғұс шешемді ар-ожданы мазалайтын сияқты. Шамасы ол мінәжат ететін болса керек, бірақ маған ептеп жеңіл бола бастаса, тағы да баяғы қалпына түсіп, немкеттілікке салынады...”

Бұл хатты одан әрі оқу өте қиын. Өзіне-өзі қол салудан тайынбаушылық, спиритизм, көз байлау және жүйкенің жұқаруы – хаттың мазмұны осыған келіп саяды.

Біз Құтқарушымыздың барына қуанамыз; Ол үшін өмір сүріп, Оған қызмет ететінімізге шүкірлік келтіреміз; Оның дұғамызды еститінін сезіне

аламыз, Ол біздің сүйікті Бақташымыз. Бірақ шайтан бұғау салып, ойын тұмшалап, өз-өзіне қол жұмсауға итермелейтін, жан-дүниесінде тыныштық жоқ адамдар да бар ғой. Оларды көргенде жаның ашып, жүрегің сыздайды! Біз қауіпті дұшпандарымыздың құлдарына айналып, еріксіз шырмалған адамдар үшін ұдайы мінәжат етуіміз қажет. Құдай балалары, қуаныш пен күш Тәңірде екенін айта алатындар, еркін болғысы келгенімен, бұғаудан құтыла алмай жүрген байғұс құрбандар туралы ойландар. Оларды өз мінәжаттарыңнан қалдырмаңдар. Осы қасиетті міндетті мойындарыңа алыңдар, бұларға да Құдайдың Құтқарушы және Жұбатушы ретінде ашылуы үшін мінәжат етіңдер.

Спиритизмнің нәтижесі

Бұл тарауда мен сіздерді аруақтарды шақырумен айналысатындармен, яғни, өлгендердің аруақтарымен сұхбаттасатындармен таныстырмақпын.

Бір әйел былай деп жазады: "Осыдан жиырма жыл бұрын мен аруақ шақырумен айналыстым. Адамдар маған бірінен соң бірі келіп жатты. Айтқандарымның көпшілігі жүзеге асты. Жоқшылық не істетпейді, ақша жетіспегендіктен, мен мұнда тұрған еш нәрсе жоқ деп ойладым. Бірде маған бір сенуші әйел келіп, бұл жексұрын іспен айналысуды тастауымды өтінді. Ол менің аруақ шақыратын кітабым мен картамды алып кетті. Осыдан кейін апта бойы жанымды қоярға жер таппадым. Мұның енді қайталанбайтынын айтып жылап отырып Құдайға уәде бердім. Көп кешікпей мен қауым мүшесі болдым. Күйеуім бұған қарсы

болса да, мен оның кедергі жасауына тиым салдым. Күйеуімнің өлерінен шамалы уақыт бұрын: “Менімен бірге сенушілердің жиналысына барғың келмей ме?” – деп сұрадым. Ол болса, Құдайға тіл тигізетін кесір сөзбен жауап берді. Бірде күйеуім бір жаққа кеткен еді, үйге ауыр халде алып келді. Демі біткенше ақыл-есі болғанымен, сөйлей алмады. Мен тізерлей отыра қалып, Құдайға жалбарынып, оның күнәсін кешіруді және оны менің мойныма артуын сұрап мінежат еттім. Күйеуім болса, менің мінежатымды естіп жылады, осы күйінде ол мәңгілікке аттанды. Күйеуім өлгеннен кейін мен неше түрлі дыбыстарды жиі еститін болдым, бірақ Құдайға сене бастағаннан кейін қорқа қойғаным жоқ. Бал ашып, аруақтарды шақырып жүрген кезімде бөлмемнен белгісіз бір сұлбаларды көріп, түсініксіз сөздерді естуші едім”.

Бұл әйел осы уақытқа дейін әлі шайтанның шырмауынан шыға алмай жүргені туралы шағымдануда. Оған келіп жүрген сенуші әйел оның үйінде қорқынышты құбылыстар барын және ол шайтанның билігінде болуы мүмкін бе, соны сұрап жазған екен. Әрине, егер бұрынғы істегендерінен бас тартпаса ол шайтанның билігінде. Құдай Сөзінде былай делінген: “Мұны жасаған әркім Тәңір алдында жексұрын”.

Ыдыс айналдыру

Берлиннен келген хатта ыдыс айналдырудың қалай болатыны туралы жазылған: “Таныстарымыз арқылы әйеліміз екеуміз шыны аяқты айналдыру туралы білдік. Біз спиритизм – шайтанның ісі екенін білетінбіз, сондықтан онымен айналысқан емеспіз.

Бірақ біз үшін бұл бір жаңалық болып көрінді. Ыдыс қағазға жазылған әріптердің бірінен екіншісіне қарай айнала берді. Бізбен кім сөйлеседі деген сауалға өлгендердің рухының аттары аталды. Әрбір сұраққа жауап қайтарылды, бөлмеде болғандардың бәрі де жауап алды.

Жұбайым екеуіміз Құдайды іздеп жүргендіктен, дүлей күштен қорғанышымыз барын сезгенбіз. Иә, біз Құдайды іздедік, бірақ шын жүректен болмаса керек, әйтпесе осындай күнәға батпас едік. Біз Құдайды шын жүректен іздегенімізбен, тәубеге әлі де келмеген едік. Құдай біздің ізденісімізді біліп, осы бөлмеде ыдысты қандай күштің айналдыратынын ашады деп сендік. Мұны біздің білуімізге тура келді, алайда біз ойлағаннан басқаша жағдайда.

Бірде әйеліміз екеуіміз оңашада сауал қоя бастадық. Қызу күрес басталды да кетті. Біз аруақтарды кейін серпіп тастадық та, бізбен шынында кімнің сөйлесіп тұрғанын білмек болдық. Сонда ыдыс үстел үстінде бұрынғыдан бетер қатты айналып, жазылған әріптерді біресе шашып, біресе қайта жинастыра бастады. Біз дүлей күш рухымен сөйлесуден бас тартып, шындық рухын шақырдық. Егер бұл шайтаннан шықса, жауап бермей-ақ қойсын дедік. Ақыр аяғында “Құдайдың хабаршысы” деген жазуды оқыдық.

Ол біздің айтылмаған ойларымызға да жауап бере бастады. Біз секем алып, бұл рух өзін дұрыс атай қойды ма екен деп ойладық. Сонда: “Шын сеніңдер, мені Құдай жіберді. Сендер Құдайды нағыз іздеуші болғандықтан, Оның сендерге ашылғысы

келді. Құдай кімге ашылатынын Өзі біледі”, – деген жауапты оқыдық».

Бұдан кейін хатта соттың болатын күні таяу қалғаны және олар алдын-ала пайғамбарлық жасауы тиіс болатыны жайлы хабарлар бірінен кейін бірі айтыла бастаған. Әділеттілер ретінде, олар Құдайдың келетіні туралы қиямет күні туғанша куәландыру керек екендігі жазылады. Өзін “Құдай елшісімін” деп атаған рух олардың үш жасар қыздарын өзімен бірге алып кететінін, содан соң олардың он бір жасар ұлдарымен бірге пайғамбарлық қызметтерін бастаулары керектігін айтты. Олар Исаның өзі сөйлеген екен деп сенді. Көптеген күндер мен апталар бойы олар осы тыңдағандарының әсерімен жүрді. Олар осы рухтың ықпалына түсіп, уақытымен тамақ ішуді, балаларын тамақтандыруды ұмыта бастады. Күн озған сайын жағдай шиеленісе түсті. Рух әйелге ақымақтық сөздерді де айтқыза бастады, ал әйел болса, бұл оның жүрегінен шықты деп ойлады. Бірде ол қинала былай деді: “Егер менің жүрегімде жамандық жатса, оны салған шайтан, мен ондай емес едім ғой”. Мұндай сөзден кейін ыдыс қатты «мазасызданып» кеткен.

Ақырында олар өздерін шайтан алдап, шырмауына түсіргенін түсінді. Сондықтан олар шайтанның ықпалынан құтылып шықты. Осыдан кейін екі күн бойы әйелді жын буды. Ол үрей үстінде дәл Киелі кітаптағы жын буған адам сияқты: “Иса, Дәуіттің Ұлы, мені аясаңшы!” – деп айқайлады. Сонда жын ғайып болды. Бұл адамдар сол сәтте шайтанның бұғауынан босаған.

Міне, ыдыстың немесе стақанның “бейкүнә” айналуының салдары осындай.

Спиритизммен айналысқан бір жігітке күтім жасаған жас медбике мұнымен айналысқан адамдармен болатын сұмдық жәйттер туралы былай дейді: “Кешке қарай оның қасында отырып, Құдай Сөзін оқыдым, түні бойы сырқат жігіттің жанында кезекші болып отыруыма тура келді. Осы түнде кенет от жалынын көрдім. Содан кейін сырқаттың төсегінен түтін шықты, бір бейне қолын созып, жалынды өшірді. Мен жалма-жан Құдайға құлшылық еттім. Келесі күні ештеңе істей алмадым, тек мінәжат етумен ғана болдым”.

Магнетизм

Бір адам маған бұрын спиритизммен және магнетизммен айналысып, кейін одан құтылып шыққан адамдар туралы айтты.

“Бір кісі магнетизер еді. Бұған ол спиритизммен айналысқаннан кейін келді. Жын-шайтан егер ол осы іспен айналысса, оған көп табыс келтіретінін айтса керек. Ал оның әйелі спиритистер үйірмесінде медиум болған. Сырқат адам келгенде не істеуді білмесе, әйелі екеуі не істеу керектігін аруақтардан сұрау үшін көрші бөлмеге кіретін. Ол болса аурудың түрін айтып, емдей ала ма, жоқ па, соны айтатын.

Бұл кісі әрбір магнетизер өзінің магнитті өрісі арқылы күніне үш-төрт адамға қызмет көрсете алатынын, соңғыларға қарағанда алдыңғыларға аз ықпал ететіні, өйткені, күші сарқылып қалатыны туралы айтты. Көп сырқаттарды қабылдау үшін ол

жын-перілерден күш алуы керек. Сондықтан ол әр күні ауруларды өзінің қажетіне қарай қабылдайтын болды. Ол ешқашан магнит күшінің жетімсіздігін сезінбеді, өйткені, оған “жетекшісі” бас-көз болып, қанша керек болса, соншалықты күш беріп тұрды. Біз әйеліміз екеуіміз осы отбасында болып, олармен бірге Құдайға құлшылық еткенде, оның әйелі де жан-тәнімен Құдайға мінәжат етті. Сол күннен бастап оның күйеуіне науқас адамдар келуін тоқтатты. Бұл әйел бізді спиритистердің бас қосуына шақырып, оның барлық мүшелеріне болған жағдайды айтып беруімізді өтінді. Құдайға тәубе, бұл қоғамның мүшелерінің бәрі осыдан кейін сол істен бас тартты. Олардың үйірмелері тарап, көпшілігі біздің жиналыстарымызға қатысып жүр».

Бұл айтылғандардан көз байлау (гипноз) және магнетизммен айналысудың қандай қатерлі екені байқалады.

Қауіпті эксперименттер

Кейде осы туралы естіп отырып-ақ дүлей күштің қармағына түсіп қалуға болады. Бұған біз төмендегі хаттарды оқу арқылы көз жеткізе аламыз:

“Өткен жылы қалада көз байлау, спиритизм, өзін сендіру туралы дәрістер оқылған еді; кәдімгідей толық дәрістер сериясы болып өтті. Мен қатысқан алғашқы дәріс көз байлаушылық жайында болды. Билетке өз мекен-жайымды көрсетуім керек екен. Залға кіре берісте мен оны тастап кеттім. Көз байлаушы “экспериментті” бастап, келушілерді даярлау үшін бәріміздің соған қарап отыруымызды, еркімізді толық

соның билігіне тапсыруымызды, қолымызды бірінің үстіне бірін салып, оның аузынан шыққан сөзіне құлақ асуды өтінді. Біршама уақыт өткен соң, тәжірибеге қатысушылар қолдарын бір-бірінен айырып ала алмай қалды. Көз байлаушы ең басты мақсатына – байланысқа (контактқа) жетті. Содан соң арамыздан жеті адамды таңдап алып, тәжірибесін жалғастыра берді. Ол әлгілерді ұйықтатып тастады да, ақылға сыймайтын таңғаларлық істер істеді. Мен бұған таңтамаша қалып, үйге келген соң бұл туралы сенуші үш апайыма баяндадым. Олар мұның шайтанның ісі екендігін айтты, бірақ мен бұл сөзге сенбедім. Біраз күн өткен соң, төсекке жатқаннан кейін көп уақыт ұйықтай алмадым. Бір мезгілде бөлменің есігі жер сілкінген кездегідей сықырлай бастады. Мен көрші бөлмеде жатқан апайыма: “Бұл не?” – деп айқайлады, ал ол болса: «Мен де білмеймін», – деп жауап берді. Есік одан да қатты селкілдей бастады. Мен керуеттен ұшып тұрып, шам жақтым. Бірақ ештеңе өзгере қоймады. Зәре-құтым қашқан мен: “Құдайға сиын!» – деп әпкеме айқай салдым. Ол сиына бастады, бірақ жағдай бұрынғыдан да жаман болды. Кенет мен Киелі кітапты есіме түсіріп, «Өзіңнің Киелі кітабыңды оқы», – деп айқайлады. Ол Киелі кітапты ашып оқыды. Оқылғаннан мен ештеңе түсіне алмадым, ол оқып отырғанда біреулер есікті дүңкілдетіп қақты да, естіртпеді. Бұдан кейін әпкем қайтадан оқи бастады мен не естідім дейсіздер ғой? Тәңір оған Қолостықтарға жазылған хаттың 2-тарауының 8-аятын көрсетті, онда: “Қайдағы біреу пәлсапасымен, пайдасыз ілімімен сендерді баурап алмасын, байқаңдар! Адамдар ойлап шығарған

аңызға негізделген ондай ілім Мәсіх туралы емес, әлемдегі тұрпайы рухани күштер туралы үйретеді”, – делінген. Осыны естіген кезде мен өзімнің шайтанның алдауына түскенімді ұқтым. Осы кезде денемде электр тогы жүріп өткендей болды да, қалшылдап-дірілдеп құлап түстім. Осы кезде әпкемнің: “Иса Мәсіхтің атымен, шайтан, саған әмір етемін, одан аулақ кет, қаранды өшір!” – деген дауысын естідім. Сөйтіп, дүлей күш зым-зия жоқ болды. Осыдан кейін әпкем және тағы бір сенуші адам үшеуіміз бірге мінәжат етіп, шайтанның шырмауынан босата гөр деп Құдайға жалбарындық. Келесі күні кешке, бәріміз менің бөлмемде отырғанымызда, шайтан найзағайша сап етіп, мені селкілдете бастады. Сенуші досым мені бұл жолы да Мәсіхтің аққан Қанының рақымымен дұғада Тәңірдің тағының алдына апарды. Құдай біздің мінәжатымызды естіді, енді мен шайтанның өктемдігінен азатпын”.

Адамдардың көпшілігі барлығына қатыссам, бәрін көріп-білсем деп ойлайды. Мұндайларды қандай қасірет күтіп тұрғанын жоғарыдағы әңгімеден көруге болады. “Шайтанға саусағыңды берсең, ол қолыңды қолқаңмен қосып суырып алады”, – деген мақал тегіннен-тегін айтылмаған. Бұл – өмірден алынған ақиқат. Бірақ шайтан бір қолыңмен қанағаттанбайды, ол жаныңды да, тәніңді де қолына түсіргенше тағат таппайды. Сондықтан біздер түрлі дәрістер мен сеанстардан сақтануға тиістіміз. Тозақ оты тез арада лап ете түседі. Шайтанның шырмауына түсу оңай. Ал мұның аяғы қасіретпен бітеді.

Көз байлау (гипноз)

Көз байлаушылықтың көпшілік ойлайтындай залалсыз іс еместігін мына хаттан көруге болады: “Соғыс кезінде мен ашаршылықтың салдарынан жүйке ауруына шалдықтым. Күш-қуатымның сарқылғаны соншалық, мамандығым бойынша жұмыс істеуге де шамам келмеді. Көптеген дәрігерге қаралып, олардың айтқан ақыл-кеңестері бойынша емделдім, бірақ жағдайым жақсармады. Содан соң мен дәрігер-психотерапевтің емханасына бардым. Оның емдеу әдісін сұраған да жоқпын. Ауырған кезде адам жан-жағын абайламай кетеді ғой. Дәрігер мосқалдау, сырт пішіні өте тартымды кісі екен. Ол менің қасіретімді жақсы түсінетін, өте ақылды адам болып көрінді.

Алғашқы күні менің төсегіме келіп, өзінің көзіне қарауымды өтінді. Содан соң ол менің оң қолымды шынтағымды бүге көтеріп, мені өзінің сөзімен дегеніне көндіре бастады: “Сіз маған қарайсыз, енді жаныңыз тыныштыққа бөлене бастайды. Мен қолымды маңдайыңызға салғанымда, сіз әбден тынышталып, ұйқыға кетесіз. Тершеңдігіңіз кетіп, өзіңіздің сауыққаныңызды, күшіңіздің толғанын сезінесіз. Сіз қолыңызды қайыра қойғыңыз келеді, бірақ олай ете алмайсыз. Сіз қатты ұйқы құшағындасыз...” Оның айтқандарына менің күлкім келді, өйткені мен ұйықтаған жоқ едім және өзімді тәуір сезінген жоқпын, ал егер керек етсем, қолымды қайта орнына қоя алар едім.

Екінші сеанстан бастап, әрбір күні таңертеңгі төртте мені жын-шайтан қинап, ал түнде түсіме жаман

түстер еніп, мазамды алды. Бір күні таңертең оянсам, бөлменің іші тыныштық орнағанына қарамастан, бүкілжын-шайтан маған қарсы аттанғандай бойымды қорқыныш биледі. Дәрігер менің бұл жағдайымды көз байлағаннан кейін болған өзгеріс деп түсіндірді. Көп кешікпей бәрі орнына келетінін айтты. Оның сөзіне қарағанда, басқа ауру адамдар бұдан жапа шекпейтін көрінеді. Бірақ мен бұл сөзге қанағаттана алмадым. Әр таңды үреймен қарсы алып, Құдайға құлшылық етіп, мұның бәрі нені білдіретінін және мені алда не күтіп тұрғанын білдіре гөр деп жалындым. Өзімді Оның қарамағына толықтай беретініме уәде еттім. Тек Ол мені кез келген жамандықтан қорғаса болғаны. Әрбір көз байлау сеансы алдында мен Құдайға сиынып, маған мейірімділік жасай гөр деп жалбарындым. Жаман түс көрген кездерімде де: “Иса, маған көмектесе гөр!” – деп айқайлады, содан кейін жын-перілер жоғалатын болды. Құдай менің мінәжатымды естіп, кешікпей маған мына мазмұндағы жауапты жіберді: “Сен өз күнәларың үшін өкініш білдірдің және Тәңірге қызмет еткің келеді екен. Бірақ дұшпан сені өз жағына шығарып, билік жүргізуді ойлайды. Құдай мұны қаламайды, егер көз байлаушыға баруыңды тоқтатпасаң, кімнің билігінде болатыныңды Құдай саған үрей арқылы көрсетеді”. Мен бұл жауабы үшін Тәңірге ризалық білдіремін. Мен әлсіздігіме қарамастан, дәрігерге көз байлаушылықтың зардабы туралы түсіндіре алдым. Ол мені күлімсірей тыңдағанымен, менің ойымды түсіне алмады. Мұнда тұрған ештеңе жоқ деп мені сендірмек болды. Бірақ мен аруханадан кетуге бел будым”.

Құдай бізге ерікті басқа біреуге табыс ету үшін берген жоқ, өйткені сол біреу біздің еркіміз арқылы өз өктемдігін кімге қалай жасайтынын да білмейміз. Сенушілер өз еркін Құдайдың билігіне тапсырып, тек Соған сенуге тиісті.

Спиритизм және оның зардабы туралы мына бір хаттан оқып білуге болады: «Ф» мырза шешесінің немесе енесінің аруағы болып келген жын-шайтан жылдар бойы өзін алдап келгені туралы қорытынды жасаған еді. Мұның зардабы «Ф» мырзаның отбасында өте қатерлі болды. Әйелі түсініксіз бір аурудан мезгілінен бұрын қайтыс болды. Оның денесін қатты ауыратын күйікке ұқсас қызыл дақтар жауып кетті. Оған ешкім көмектесе алмады. Спиритизмді зерттеп, сол туралы дәріс оқуды мақсат еткен бір мырза да осы сырқатқа ұшырады». Хат авторы әрі қарай былай деп жазады:

«Бір әйелді осы ауру меңдегенде, мен одан: «Сиқыршылықпен айналысқан жоқ па едіңіз?» – деп сұрадым. Ол мұндай оқиға болғанын жасырмай айтты. Мен дереу науқастың бөлмесіндегі осы мазмұндағы бүкіл кітапты отқа жақтым. Оған бата сұрап, дұға оқығаннан кейін, сырқаттың беті бері қарап, бойын жеңіл сезінді, ал келесі күні төсегінен тұрып кетті».

Спириттер Құдай Сөзін тыңдағылары келмейді, олар қалғып-мүлгиді немесе жиналған жерде есінеп отырады. Бойды меңдеп алған жын-шайтан денені тітіркендіріп, түрлі дауыстар шығаруға итермелейді. Бірде жас қыздың денесі селкілдеп, бірнеше сағат бойы тілі байланып қалғаны бар.

Аруақтардан сұрап отырып, бүкіл сауалға жауап беретін сәуегейлер де бар. Берлинде бал ашатын бір әйел болды, ол түрлі жынды шақырғаны үшін алатын ақысын есік сыртына жазып қоятын. Сенуші адамдармен кездескенде, мұндай сәуегейлер нақұрыстанып кетеді. Бұл олардың ауыр, қадала қарауларынан немесе бекерден-бекер түкіре беретіндіктерінен, сенушілерге қарай қолдарын сермеулерінен байқалады.

Бәрін танып-білуге құштар болып сиқырды зиянсыз деп ақтау қандай қауіпті!

Шайтан мың құбылып, бізге нұрлы періштенің кейпінде де көріне алатынын бізге мына бір хат дәлелдейді. Онда елші Пауылдың, Лютердің және т. б. аруақтары қатысады деген оккультистер жиыны туралы айтылады. Бұлар оған түрлі түсініктемелер береді. Ең сұмдығы, олар осы бас қосуда тек Біреу туралы әңгімеледі. Ол Біреу – Иса. Мұны қалай түсінуге болады? Олар өз қылықтарын Құдайдың қолдауымен істейміз деп сенеді. Сонда не болғаны? Өйткені, өлгендердің әруағын шақыруға және олардан сұрауға Киелі кітап тыйым салды емес пе? Шын мәнінде, қай рухтың келетінін мұндағылардың ешқайсысы білмейді. Дұға оқылғанына қарамастан кейбір жиналыстарға бірде-бір рух келмеді. Бүкіл қатысушылар “сенушілер” болуы тиіс, шүбә келтірушілердің кірмеуін өтінді. Медиум – 70 жастағы кемпір. Күнделікті өмірде ол ауызекі сөйлеу тілін ғана білетін қарапайым әйел. Оның рух айтқан күрделі сөйлемдерді қалай жазатыны мен үшін жұмбақ. Оның жазғанынан мысал келтірейін: “Құдайдың, өздеріңнің Өтеушілерің және Құтқарушыларыңның

атынан сендерге менің – бауырларың Пауылдың рухы келеді. Тыңдандар! Мұнда бұл туралы дұрыс түсініктері жоқ адамдар бар. Сендер өздеріңнің қате көзқарастарыңмен еріншек, жылымшы болудан сақтаныңдар. Қымбатты жандар, Исаның Әкесіне жақын жүріңдер, бақыт күні жарқырап тұрғанда, өздерің тілегендердің бәрі де болады, сендер көтеріңкі көңілде қымбатты Әкеге қуанған жандарсыңдар, алайда сендердің үміттерің үзіліп, бақытсыздыққа душар болғанда досың көмекке келмесе, сендер бір нәрседен қорқып, күмәндана бастайсыңдар. Сондықтан, менің сүйіктілерім, егер кейде айналасыңда қара бұлт түйіліп келе жатса, Иса Әке арқылы күш алып, нұрға қарай батыл қадам басуларың керек. Құдай сендермен бірге! Сау-саламат болыңдар!"

Елші Пауыл осындай бос мылжың сөздерді айтар ма еді? Ол «Иса Әке» туралы айта алар ма еді? Киелі кітап тұрғысына аз-кем ойлана білетін адам мұның алдамшы, жалған екенін бірден түсінеді. Шайтан неліктен өзін періште кейпінде көрсетіп, Пауыл елшінің атынан сөйлейді? Оның түк те құпиясы жоқ. Тірі Құдайды іздеген жандар осындай жолмен Мәсіхшілердің ақиқат өмірінен және Құдай Сөзін дұрыс түсінуден қол үзеді. Міне, осылайша оккультистер он бес жыл бойы бас қосуда. Егер олар дұрыс жолда болып, өз өмірлерін Тәңірге қызмет етуге жұмсаса, осы уақыт ішінде қаншама игілікті іс тындыруға болар еді. Амал не, шайтан оларға жалған әділдікті ұсынды. Сөйтіп олар шындықтан тайып, ақиқатты аяққа басты.

Теософия

Шайтан оккультистер секілді лорбериан дегендерді де адастырып бағуда. Лорбериандар дегеніміз, періштелердің дауысын естиміз деп айтатындар, өздерінің медиум-әкесі Лорбердің кітабын “Ізгі хабардың аянышты кітапшаларынан” жоғары тұр деп есептейді.

Грацтық музыкант Яков Лорбер XIX ғасырдың екінші жартысында өмір сүрген. Бір күні ол өзінің ішінен дауыс естіген. Осы дауыстың жетегіне еріп, ол «Жоханның Ізгі хабары» деп аталатын көп томды кітап жазған, мұнда Исаның өмірі әр күні күнделік формасында берілген. Мен осы еңбекті оқып шығуға қанша тырыссам да, оқи алмадым – Құдайдың киелілерін балағаттау менде қатты жиіркеніш тудырды. Бұл жалған «Иса Әкенің аяндарын» лорбериандардың Киелі Рухқа кенелген Құдайдың пайғамбарлары Ишая мен Еремия жазбаларымен қатар қоятындарын қайтерсің. Ал шын мәнінде, Яков Лорбер бар-жоғы көшірмеші медиум ғана болған.

Бір бауырлас маған былай деп жазды: «Өмірімді дұрыстап өткіземін» деп ойша уәде бергендерді де шайтан тауып алады. Мұндайларға ол киелену ілімі – теософияны ұсынады. Оған қоса, ол бұл ізденушілерге олардың ауыр да жанқиярлық күресі үшін табиғаттан тыс бақытты сәтті сый-сияпат етіп береді. Еркіндік пен азаттық – бұлар әрбір шынайы теософтың басты мақсаты. “Құпия хикая” (Даналық кітабы) мен “Жаңа селимнің” жазбалары (Лорбердің еңбектері) адамдардың Ізгі хабарға көзқарасын бұзады.

Менің басымда да осындай жағдайлар болды. Мен медиумдардың ілімімен, оккультик әдебиет арқылы көріпкелдермен, түс жорушылармен, спиритистермен таныстым. Алғашында шайтан мені өз қолыммен түрлі құлақтандыруларды жазуға итермеледі, яғни, мен қолымды ұсынып едім, ол бүкіл денемді алып қойды. Шайтан майда тілімен мені спиритистерге медиум болуға үгіттеп бақты. Жын-перілер тіліме ғана емес, тәніме де иелік етті. Менің халімнің жаман болғаны сондай, тіпті есі ауысқандар үйіне жіберді. Өз бетіммен құтылуға күшім жетпеді, ал бірде-бір оккультист маған көмектесе алмады. Ең үрейлі, қорқынышты сәт келді: шайтанның жүрегімді жаулап алғанын анық сезіндім. Шайтанның кебін киіп, мен жақындарымды, сондай-ақ Исаның атын келеке еттім. Нағыз тозақ азабы басталды. Жындар мені күннен-күнге азапқа сала берді. Осындай қиналыс кездерінде денемді жарақаттап алдым... Мені жындыханадан шығарғанымен, денсаулығым толықтай бұзылды, сал боп қалдым, денемде әлсіздік пайда болды. Мен үшін жаннаттың есігі жабылды. Шайтан болса, өзінді өзің өлтір деген "дана" ақыл берді. Бірақ күнделікті азапқа қарамай, мен өмірді сүйгендіктен, ондайға бара алмадым. Құдайға тәубе, Ол мені Тайхвольфрамсдорфқа жетелеп әкелді. Мұнда мен Иса туралы естідім. Алайда Құдай менің бұрынғы жағдайымды біледі ғой деп ойлағанымда, күйзеліске түсіп кететін кездерім де болды. Соған қарамастан жүрегіме Исаның аты терең ұялай бастады. Ақыр аяғында мен сенімге ие болдым. Сондағы қуанышымды айтып жеткізе алмаймын! Бір ғана есімді мәңгі

даңқтап, Оған табына алам, бұл есім – Иса Мәсіх! Ол тірі! Көп кешікпей Құдай Рухы менің көмегімсіз-ақ бүкіл жын-періні қуып, мені ауруымнан айықтырды. Мәсіхтің Қаны мен Оның Рухы көп жыл бойы еш нәтижесіз күрескен мені жын-перінің қыспағынан босатты. Сал боп қалған денем араға бірнеше апта салып қайтадан қозғалысқа келді, дәрменсіздіктен арылып, мүлдем сауығып кеттім. Мәсіхтің құтқаруын керек етпеген оккультистер, теософтар, спириттер, көріпкелдер, магнитопаттар, көз байлаушылар – Мәсіхтің мейіріміне әлі сенбегендер туралы ойлағанда жүрегім сыздайды. Оларды алда қандай тағдыр күтіп тұр!?

Тіпті қазірдің өзінде шайтан мені азғырмақ болады, жын-шайтандар маған қол жұмсауға тырысады, бірақ олар дәрменсіз, өйткені, мен Мәсіхтің Қанымен құтқарылған жанмын!”

Спиритуализм

Басқа бір хаттан мынаны оқимыз: “Мен қызмет бабымен жүріп, мәсіхшілерміз деп санайтын отбасымен танысқаныма дейін сенуші болған жоқпын. Олар болса, Құдайға құлшылық етіп, жиналыстарға қатысатын, тыныш өмір кешіп, біреудің қайғысына ортақтасатын. Бұл адамдар өздерін спиритуалистерміз десе де спириттер еді. Мұның не екенін білмедім, бірақ онда құдайшылдық, жақсы бір нәрселер болуы тиіс деп ойладым. Бұл адамдар мені өздерімен бірге жиі ертіп жүрді, бір сенуші бауырлас бұл күнә деп түсіндіргенше, шамамен бір жылдай уақыт бойы спиритизм бұғауында

болдым. Төрт аптаға жуыққа созылған қиян-кескі күрес басталып, әйтеуір Құдайға тәубе, Ол мені құтқарып алды. Осы төрт апта ішінде менің көзіме бәрі екеу болып елестеп, құлағым екі дауысты қатар естіді. Кешке, спирттер жиынынан кейін мені үрей билеп алатын болды, үшбұрыш ішінде жарқ-жұрқ еткен бір нәрселер елестей бастады. Шынайы адал жолды көрсете гөр деп Құдайға құлшылық еттім. Мәсіх жолын ұстанушылар қауымына барып, тәубеге келдім, енді Исаның мейірбандылығы мен сүйіспеншілігіне бөленіп, Құдайдың азат та қуанышты баласы болғанымға алғыс айтамын”.

Спиритуализмнің кәдімгі спиритизмнен бір ерекшелігі – мұнда ешқандай тәжірибе жүргізілмейді. Жиындар ән айтып, мінәжат етумен, Киелі кітапты оқып, оқылған жерді түсіндірумен басталады, бұған бәрі де қатыса алады. Тыныштық орнаған сәтте, транс жағдайындағы медиумдардың бірі орнынан тұрып, Жазбаны түсіндіре бастайды. Ол 10-30 минут сөйлейді. Әдетте олар былай деп бастайды: “Құдайдың сүйікті балалары, сендерде жан тыныштығы болсын. Мен мендерге Аспандағы Әкемнің Сөзін жеткізгім келеді”. Медиумдар Құдай періштесі, Көне Келісімнің пайғамбары, Мартин Лютер және тағы басқалар болып сөйлейді. Мұндай бас қосуларға өздерін “Ақиқат жолының ұйымы” немесе “Эммаустың ұйымы” деп атайтын алты медиум қатысады. Бұл алтаудың үшеуі – шешен-медиумдер де, ал қалған үшеуі – көріпкелдер.

Олар қатысушыларға қазіргі сәтте жиналыста не болып жатқаны туралы әңгімелейді. Мәселен: медиумның рухы өз қамқорлығындағы адамды

қалдырады да, оның үстелінің жанында тұрған бөтен рух медиумге еніп, сол арқылы әрекет жасай бастайды. Тек тұрақты мүшелері ғана қатыса алатын жиынға қатысушылардың айтуына қарағанда, оларға “Иса Мәсіхтің Өзі” келетін көрінеді. Сол кезде бәрі де бата алу үшін тізелерін бүгіп, бір-бірден еңбектеп жақындайды. Олар спиритуализмді таза рухани ілім ретінде көрсетуге тырысады және он екі шәкірттің есімін алған он екі бауырды Исаның өзі үйретеді деп сендіреді. Медиумдер де Киелі кітаптағы белгілі кейіпкерлердің есімдерімен аталынады. Иса Мәсіх шәкірттерін үш жыл үйретуге тиіс, содан кейін олар жетілген деп саналады. Ал бұдан басқаның бәрі үзілді-кесілді жоққа шығарылады, өйткені олар білімнің бәрін медиумдар арқылы өз ұстазынан алды деп есептеледі. Олардың айтуы бойынша, адамзаттың жерде білім алуы мен түзелуі үшін Құдай жерде қалдырған бір нәрсе бар. Медиумдерге тек арнайы бағышталған жоғары тіршілік иелері ғана келеді. Спиритуалистердің міндетіне сондай-ақ медиумдер арқылы айтылатын өлгендердің рухын Құдайға әкелу жатады. Мынандай да жағдай болған. Кезінде ғибадатханаларда ұрлық жасаған, өлгеніне 200 жыл болған бір адамның аруағы медиум арқылы сөйледі. Кісі өлтірген біреудің аруағы да осылай еткен және т. с. с. “Бауырластарға” бұларды рухтармен бірге дұға жасау арқылы Құдайға әкелу туралы тапсырма берілген көрінеді. Құдай туралы естігісі де келмейтін рухтар бар. Бас қосуға әрқашан бұрынғы рухтар келеді. Бұл рухтар басқа рухтарды да шақырады. Сондай-ақ зұлым ниетті рухтар да келеді. Бірде сондай дүлей күшті рух жай күндері әлсіз

медиумдардың біріне енеді. Сонда нақұрыстанған медиумды ұстап тұруға 4 медиумның күші зорға жеткен кез де болды. Осыдан соң ол 15 минут қозғалыссыз, демсіз жатты. Барлық “бауырластар” мен жиынға қатысушылар жанның денеге қайта оралуы үшін дұға оқыған көрінеді. Рух медиумды босатқаннан кейін, ол ештеңе болмағандай орнынан тұрды. Бірақ мұндай оқиғалар тек санаулы адамдар болған орталарда ғана болды.

Келген рухтарды “бауырластар”: “Сенің күнәңнің кешірілуі мүмкін, олар қан сияқты қызыл болғанымен, оларды қардан да әппақ етіп жууға болады”, – деген секілді сөздермен қарсы алатын көрінеді. Рухтар көптеген түрлі құпияларды да ашады.

Бірде бір әйел мені осындай жиынға шақырды. Ол әйелдің өзі дәрігерлер көмектесе алмаған көптеген сырқат адамдарды магниттің күші арқылы сауықтырған көрінеді. Олақы-пұлсыз емдейтіндіктен, адамдар оған толассыз ағылады екен. Мен сонда емделуге келген бір сенуші апайды да көрдім, ол мұнда тұрған ештеңе жоқ деген сыңай танытып, бұл жерде бәрі Иса Мәсіхтің атымен және дұғамен жасалатынын айтты. Ұйымның ұраны: “Өзіңнің Құдай Тәңіріңді және жақыныңды өзіңдей жақсы көр”.

Спиритуализмнің қаншалықты кең тарағанын мынадан көруге болады. Жиында айтылғанның бәрі стенография арқылы жазылып алынады да, кейін бұл дәріс көбейтіліп таратылады.

Шайтанның кез келген жолмен адамдарды алдап-арбауға әзір тұратынын көрдіңіздер ғой. Адамдар мұны күнә деп ойламауы үшін ол Киелі кітаптан,

дұғадан сөздерді алып, Құдай Әке, Ұл және Киелі Рух атынан айтады. Бұдан ештеңе өзгермейді. Бәрібір осы күнә арқылы адам шайтанның шырмауында жүре береді.

Астрология

Мен сіздерді астрология, яғни жұлдыздар саласын зерттейтін ғылым туралы айтылған хатпен таныстырсам деймін:

“Осыдан біраз уақыт бұрын, – деп жазады бір әйел, – мен Берлиндегі астрологқа болашағымды біліп беруді өтініп хат жолдаған едім. Көп кешікпей одан жауап алдым. Бұл адам өмірімнің алғашқы жартысында менде бақыттың болмайтынын, ал оның есесіне өмірімнің екінші жартысында үлкен табыс пен баянды бақыт күтіп тұрғанын айтыпты. Ол менің өміріме қауіп төндіретін екі оқиға туралы болжапты. Енді мен күндіз де, түнде де тыныштық табар емеспін. Киелі кітапты оқығаныммен, ештеңе түсінбеймін”.

Осы мазасыздық пен үрейдің өзі – астрологтардан алдағыны сұраудың күнә екендігінің нақты дәлелі емес пе?

Тағы бір хатты оқиық: “Сіздерде де көптеген адамдар спиритизммен айналыса ма? Бізде осындай жиырмаға жуық үйірме бар, тіпті кішкентай балалардың арасында да осындай үйірмелерді ұйымдастыруда. Мұндай істердің зардабы қандай болатынын көрсетіп берген Құдайға біз ризамыз. Жақында бізде бір жас жұбайлар қонақ болды. Олар да шайтанның шырмауына түсіп қалғандардың

бірі болғандарын айтты. Байғұс әйелді жынның айналдырғаны соншалық, ол есі ауысқандар үйіне түсіп қала жаздады. Сол кезде бірнеше сенуші адамдар олар үшін сиынып, ол ұзақ уақытқа созылған рухани шайқастан кейін шайтанмен байланысын үзді. Ол әңгімесін аяқтағанда, жүзі қуаныштан бал-бұл жайнады: «Енді шайтан маған түрлі жексұрын ой салса, бірден Құтқарушыны шақырамын, сонда бәрі қалпына келеді».

Құдайға шүкір, Мәсіхтің аты оккультизмнің құрбаны болғандарды құтқаруда. Аспан астында адамдардың құтқарылуы үшін берілген бұдан өзге есім жоқ.

Шайтанның шырмауынан қалай құтылуға болады?

Бұл осы кітаптың соңында айтқалы отырған ең маңызды мәселе

Күнәні мойындау

Алдымен көкке баратын жолды жабатын ауыр күнә туралы айтылып жатқанын түсіну керек. Бұл жөнінде Киелі кітапта қалай айтылғаны туралы тағы да естеріңізге сала кетейін. Леуіліктер кітабының 19-тарауының 31-аятында былай делінген: “Аруақтарды шақыратындарға істерің түспесін, сиқыршыларға да бармаңдар, өздеріңді олардың қорлауына бермеңдер. Мен, Тәңір, сендердің Құдайыңмын”.

Толығымен түсінікті болуы үшін, қосымша ретінде Леуіліктерден 20:6,7; Мысырдан шығудан 22:18; Заңдарды қайталаудан 18:9–13; Аяннан 21:8; 22:15-ші аяттарды оқыңыз.

Бұл жерлерде мұның Құдай алдында жексұрын қылық екені, күнә жайлы айтылып, ал оны жасағандарды таспен атқылап, адамдар арасынан аластау және Құдай Патшалығына енгізбеу жазалары қолданылатыны туралы жазылған.

Тағы да айтамын: ең бірінші мұның ауыр күнә екенін түсіну керек. Бірақ адамдардың көпшілігі мұны ермек деп есептейді. Олардың жауабы: “Бос сөз! Мұның күнәға қатысы жоқ. Бұл шайтаннан емес!” Басқалары болса: білмегендіктен жасалған іс екендігін, оның ақыры мұндай сұмдық болатындығына сенбейтіндерін айтады. Ал кейбіреулері – бұл мүлде

зиянсыз іс деп есептейді. «Мұны маған Құдайды қастерлейтін әкем айтты... “Менің дүниеден өткен шешем осымен айналысып еді... Мұнда тұрған ешқандай жаманшылық жоқ...” Тіпті былай дейтіндер де бар: “Сиқыршылықты күнә дегеніңізге өкініш білдіріп ашық жариялауыңыз керек. Бұл елшілер арқылы жеткен киелікітаптық айықтыру құралы ғой. Егерде сен оған сенетін болсаң, оның көмектесетіні бұған айқын дәлел, себебі сауығуды Құдайдың атынан аласың ғой”.

Мұның бәрін зиянсыз діни сауықтыру құралы деп есептейтін адам шын мәнінде тәубесіне келуге тиісті. Менің айтайын дегенім, мұның күнә екенін мойындамағандар мәңгілікке шайтанның шырмауында тозаққа қалады.

Құдай сөзі арқылы бал ашумен, сиқыршылықпен айналысу – үлкен күнә екенін, егер де дер кезінде тәубеге келмесеңдер, онда Аспан Патшалығына жолдың жабылатынын дәлелдеуге тырыстым. Сондай-ақ сиқыршыларға сену, болашағымды біліп бер деп бал ашушыға бару, түрлі сиқыршылық дуалары мен құралдарды қолдану, мәселен: тұмар тағу, ыдыс айналдыру, аруақтарды шақыру арқылы о дүниеде не болатынын білмек болу күнә болып табылады. Сиқыршылықтың күнә екенін білетіндер онымен айналыспайды. 13 санынан және жапалақтың дауысынан қорықпайды, тауып алған тағаны бақыт белгісі деп есептемейді және өзінің денінің саулығын айтқан кезде сол иығынан асыра түкірмейді.

Бұл істер сіздер ойлағандай зиянсыз емес. Өйткені, біздің бақытымыз бен игілігіміз тағаға емес, Құдайға байланысты ғой. Егер біз тағадан бақыт

күтсек, онда бұл біздің Құдайға және Оның Әкелік қамқорлығына толық сенуіміз болып табылар ма еді? Түкіру мен ағашты тықылдату да жалған тәңірге табыну. Бұл – әдемілікке «көз тимесін» деген жалған да зымиян ырым, бұл біздің Құдайымыз күншіл және адамдарға жақсылық пен денсаулық тілемейді деумен бірдей.

Біз өзіміздің Жаратушы Әкеміз туралы осылай ойлауға қалай дәтіміз барады? Пайдасыз, бекер ырымдармен Оның қаһарына ілігуге бола ма? Адамға қорқыныш үйіретін ырымдар келмеске кетсін. Кемеліне келген сүйіспеншілік үрейге жол бермейді, өйткені қорқыныш азап әкеледі.

Шын мәнінде, сенушілер арасында ырымшылдардың әлі де көп екені даусыз. Олар бұл туралы көп ойланбайды да. Олар тіпті түрлі ырымдардың қайдан шыққанын түсінуге тырыспайды да. Дегенмен ырымшылдық – шынайы Құдайды жоққа шығарады, сондықтан, тағы да айтамын: ең алдымен, сиқырдың кез келген түрі ауыр күнә екенін мойындау қажет.

Тәубеге келу

Екінші қадам – осы күнәні мойындап, тәубеге келу болып табылады. Тәубеге келу деген не? Тәубе дегеніміз – өз ойыңды толықтай өзгерту. Сиқыршылық тек әзіл, оның үстіне залалы жоқ әзіл деп ойлауға құқың жоқ; қайта Құдайды ренжіткенің, Оның қасиетті Есімін елемегенің үшін Құдайдан кешірім сұрауға тиістісің. Құдайдың Ұлы – Иса Мәсіхтің Қаны бізді қандай күнәдан болса да тазартатыны үшін біз Тәңірге ризалығымызды білдіреміз. Егер біз

шынайы тәубеге келе алсақ, онда Оның Қаны бізді сиқыршылық күнәсінен толық азат ете алады.

Мүмкін сен: “Мен өз еркіммен сиқыршыға барған жоқпын ғой. Мені бала кезімде біреу апарды. Мен өзіммен осылай болсын деп тілеген жоқпын”, – дерсің.

Ол да мүмкін. Бірақ бұл бәрібір күнә ғой, сенікі болмаса әке-шешенің күнәсі. Ал ақиқаты – бұл сенің еркіңнен тыс жасалғанымен, сен бәрібір шайтанның билігіндесің. Шайтан – жан түршігерлік дұшпан. Оның қол астына сен өз еркіңмен немесе басқаның әрекетімен түстің бе, ол оған қарамайды. Оған бәрібір. Енді ол сиқыршылықтың күнәсі арқылы өзімен байланысқандарды азаптап, мазақ етуде.

Адамдардың шайтанның шырмауына түскенін, сол арқылы оларды қырсық шалып, өздерін өздері өлтіруді ойлағанын қаншама рет көрдім. Бұл күнәнің мәнісі – бір кезде оны біреулердің сиқыршыға баруға ақыл бергенінен немесе бала кезінде бұл күнәға оны басқалардың үгіттеп душар еткенінен деп түсінеміз.

Шайтан тек бір нәрседен ғана – Иса Мәсіхтің Қанынан ғана қорқады! Иса Мәсіхтің Қаны – бұл кешірім мен күнәнің өтелуінің белгісі. Кімде-кім Исаны шақырса, сол барлық азаптан құтылады.

Сондықтан құтқарылуды құрбандық Тоқтының Қанынан ізде және Тәңірден сені тазартып, күнәдан азат етуін сұра.

Құдайдан бізді қасиетті Қаның арқылы тазарт деп сұрауымыз Мәсіхтің қаны бізді барлық күнәмізден тазартатынына толықтай сенуімізбен сәйкесуі керек. Ефес. 1:7-де жазылған Құдай Сөзіне сену қажет. Онда былай жазылған: “Құдайдың шексіз зор рақымымен Мәсіхтің құрбан болып қаны төгілуімен төлеміміз өтеліп, біздер жамандықтың құлдығынан азат етіліп, күнәларымыз кешірілді». Біздің мінежатымыз Исаның Ғолғотадағы айқыш ағаш арқылы кәрі жыланнның басын жаншып, шайтанның билігін алып тастағанына деген сенімге құрылуы тиіс. Киелі кітапта 36 мың уәде бар. Бірақ көпшілік адамдар үшін бұл уәденің ешқандай күші жоқ. Неліктен? Егер шайтанның: “Мұның саған қатысы жоқ, сен бәрібір тозаққа кетесің”, – деп сендіруіне мүмкіндік берілсе, бұл адам Құдайдың уәдесіне құлақ қоймай, шайтанға көбірек сенеді. Сондықтан ондайлар үшін уәденің күші жоқ. Шайтанға сенудің арты не боламын ойланып көрші. Осы арқылы Исаны «өтірікші» атадың ғой. Ол осыған лайық па еді? Ол: “Жол, шындық және шынайы өмір Менмін”, – деп айтқан жоқ па? Құдайдың бүкіл уәдесі Исада екені шындық қой? Аумин! Шайтан әуелден өтірікші және өтіріктің атасы. Ол өтірік айтады және барлық пенде біткенді алдайды. Сен мұны байқамадың ба? Күнәға батырар алдында шайтан адамзатқа алтыннан тау тұрғызып беремін деп уәде етеді, ал ол жетегіне еріп, күнәға батысымен, ол адамды мазақ қыла бастайды: “Сенің күнәң тым көп, енді саған кешірім жоқ”, – деп қорқытады. Бұл барып тұрған сұрқиялық емес пе?

Ал сенің осы алдамшыға сенгің келе ме?

Иса Мәсіх былай дейді: «Мен Өзіме келгендерді ешқашан қуып жібермеймін. Мен оларды жақсы білемін, олар Маған еріп жүреді. Соларға мәңгілік өмір беремін. Ешкім оларды Менің қолымнан тартып алмайды».

Енді сенің кімге сенгің келеді: шайтанға ма, әлде өзіңнің Құтқарушыңа ма?

«...әлі де күнәкар болып жүрген кезімізде біз үшін Мәсіх өмірін құрбан етті! Осы арқылы Құдай бізге Өзінің зор сүйіспеншілігін дәлелдеді. Енді біз Мәсіхтің қаны төгіліп құрбан болғандығы арқылы ақталған соң, Оның арқасында Құдайдың қаһарынан мәңгілік құтқарылатынымыз да сөзсіз!», – деген елші Пауылдың куәлігіне сен. Өз Құтқарушыңа сен! Ол сені алдамайды. Ол тек ақиқатты айтады. Оның Сөзіне сүйен – біздің Тәңіріміздің Сөзі мәңгілік!

Шайтанмен бұдан былай байланыспа, оның сөзіне құлақ салма. Жақып былай деді:

«Шайтанға қарсы тұрыңдар, сонда ол сендерден безіп кетеді. Құдайға жақындаңдар, сонда Ол да сендерге жақындайды».

Сонымен, өзіңді алдайтын шайтанның сөзіне сенбе. Құтқарушың Исаға сен, өйткені, Ол – Ақиқат. Ол тек шындықты айтады.

Мінежат арқылы қолдау

Алайда тағы бір өкінішті нәрсе бар: біз күнәміздің кешірілгеніне сенімді болсақ та, баяғы ескі арбаудың ықпалы аласталған жоқ. Ежелгі күнә қайтадан өзіне тартады. Мұндай жағдайда не істеу керек?

Елші Жақып бізге былай деп кеңес береді:

“Сондықтан сауығып кету үшін, жасаған күнәларыңды бір-біріңе айтып мойындап, бір-бірің үшін сиыныңдар! Әділ адамдардың Құдайға сиынуларының күші орасан зор” (Жақып 5:16). Шайтанның шырмауынан өздігінен құтыла алмайтындар өз қылығы жөнінде Мәсіх жолын ұстанушы бауырласының алдында тәубеге келіп, күнәсін мойнына алсын, сөйтіп бауырластарымен бірге мінәжат етсін.

Иса бірлесіп жасалған мінәжатқа айрықша жарылқау беретіні туралы уәде етті:

«...жер бетінде екеуің келісіп, қай нәрсені болса да көктегі Әкемнен сұрасаңдар, Ол соны бермек. Өйткені екі-үш адам Менің атымнан жиналса, Мен де сол жерде араларында боламын» Матай 18:19,20.

Осылай бірлесіп мінәжат етуге ұмтылыңдар. Мұны барынша жиірек жасау қажет. Кейде дұшпан өктемдігі адамға қайтадан бой көрсете бастайтыны бар. Ондай жағдайда мінәжатты қайталаған жөн. Бұл қатты ауырғандағы жағдаймен бірдей. Дәріні бір рет қана қабылдап қойған жеткіліксіз. Аурудан сауыққанша емді жалғастыра беру керек.

Ораза ұстау

Иса Мәсіх былай дейді: “Мұндай жындарды тек Құдайға сиынып, ораза ұстаумен ғана қуып шығуға болады”. Мұның мәнісі – өткінші дүниеден оңашаланып, ұзақ уақыт мінәжат ету арқылы жоғарыдан күш алу деген сөз. Көптеген адамдар

Құдайдың құдіретімен, шынайы Мәсіх жолын ұстанушылармен байланыс жасап, Құдай сөзін бірге оқып, бірге мінәжат етудің арқасында шайтанның шырмауынан босатылды. Егер мүмкін болса, Құдай Сөзі күшінде тұрған жерде жиірек бол.

Қол қойып мінәжат ету

Қол қойып мінәжат етіп, бата сұрауды өте бағалаймын. Бұл дұшпанымыз – шайтанмен байланысты үзудің ең бір жақсы құралы екендігіне ертеден-ақ көзім жетті. Қолымызды үстіне қойып мінәжат етудің қалай жарылқайтынының бір мысалын келтірейін. Бір әйел хатында күйеуінің картамен бал ашатын шешесінің кесірінен мазасыздыққа шалдыққанын айтады. Мен оған келесі бір жолы ұстамасы ұстаған кезде үстіне қол қойып мінәжат ету керектігін айттым, себебі қол қойып сиыну қауым жетекшісінің ғана емес, қарапайым сенуші адамның да ісі болып табылады. Бірнеше айдан кейін әйел жауап берді: «Менің күйеуім сізден хат алған күні арпалыста еді. Біз бірге тізе бүктік те, мен оның денесіне қолымды қойып, Исаның құрбандық Қанының құдіретті күшін шақырдым. Оны жаншыған ауыр салмақ сыпырылып түсті. Мұндайды, тіпті, өзіміз де күткен жоқпыз. Күйеуім мазасыздықтан арылды, осымен алты ай бойы әлі бір де бір рет ұстамасы қайталаған жоқ».

Келесі үзінді Гергард Кульманның дәптерінен алынған, онда жан қамқорлығына қатысты денеге қол қоюдың мағынасын көрсетеді:

Жақыптың хатынан: *«Қайсыбіреуің ауырып қалса,*

қауым жетекшілерін шақыртсын. Олар маңдайына Жаратқан Иенің атынан май жағып сиынсын. Сөніммен сиынғандарыңа бола Иеміз науқастың денсаулығын қайтадан қалпына келтіріп, сауықтырмақ» дегенді оқимыз. Олардың арасынан тазалықта денеге қол қойып сиынуды толық күшпен жүзеге асыра алатындарын шақыру керек. Екінші жағынан, бұндайдарыны бар қызметкерлер кез келген қауымда болады. Дегенмен, денеге қол қоюды тек қауым мүшелері атқарғаны жөн. Белгілі бір қауымның мүшесі емес адамдардың қол қоюынан сақ болған абзал. Тек осылайша дұрыс қамқорлық жасалады және адам жанының ішкі халін қате бағалаудан абай болады. Қол қойып сиыну мүмкіндігі туралы анық жауап алуда ораза мен мінәжаттың мәні зор (Ел. іст. 12:2-3). Бұл қызметке Көне Өсиетте ерекше мән берген. Киелі орында қызмет етуге қолы сынған адамға рұқсат етілмеген (Леу. 21:19). Жаңа Өсиет тұрғысынан саналы түрде күнә жасап жүрген адам бата беруге қатыса алмайды. Сондықтан алдын ала ішкі тазару жүруге тиіс. Тек адам өз еркін шынымен Құдайға бағындырғысы келсе ғана Құдай қол қойып сиынуды жарылқай алады. Керісінше жағдайда қол қойған адамда күнәнің рухын берудің, батаның емес, күнәнің берілуінің себепшісі болу қаупі бар. Скеуаның жеті ұлымен болған таңғаларлық оқиға (Ел. іст. 19:13) Құдайдың қорғанышы мен қаруына ие болмай тұрып, жынданған жанға көмектескісі келетін адамды шайтанның күші жеңіп кететінін көрсетеді.

Тәңірдің алдына бөтен отты апару адам өміріне қауіп төндіреді (Леуліктер 10:1), сондықтан елші Пауылдың: «Адамдардың үстіне қол қойып, батаңды

беруде асығыстық жасама», – деген сөздерін еске салуды қажет деп таптым (1Тимоте 5:22). «Әйтпесе олардың күнәларына сен де қатысты боласың», дегенді Пауылдың әдейі қосқанына күмән жоқ.

Алғыс айту, ризашылық

Шайтанның шырмауындағы адамды көбінесе Құдайға қарсы ой мазалайды. Ал бұл ойдан қалай арылуға болады? Бұл жерде мынадай ақыл-кеңес бергім келеді. Әрине, өзіңнің жүрегіңнен шықпаған осындай ой мазалай бастаса, сол сәттен бастап мүлдем басқа нәрсе туралы ойлау керек. Голғотадағы айқыш ағашты, онда жүзеге асырылған құтқарылуды есіңе түсір.

Осы құтқарылу үшін Құдайға мадақтау мен алғыс сөздерін айт. Былай деп жазылған ғой:

«Мені мақтайтын жан құрмет көрсетер Маған,
Сақтанып жүргенге құтқаруымды ашам»

Забур 49.

Киелі Жазба бізді ұдайы сиынуға шақырады. Пауыл: «*Иеміз Иса Мәсіхтің атымен Құдай Әкеге қай нәрсе үшін де ұдайы шүкіршілік етіңдер*», – дейді. (Ефес 5:20).

Біз құтқарылғанымыз үшін айтқан алғысымыз арқылы Құдайға қарсы ойларға тойтарыс беретінімізге сенімдімін. Құдайды мадақтап, алғыс айтқан сайын, дұшпан күшін жоғалтады. Қай уақытта болса да, не болса да Тәңірге ризашылығымызды білдіруге үйренейік. «Біздің айқыш ағаш қасында тұрғанымызды көрген шайтанның зәре-құты қалмай қашады», – деген ақын сөзі шындық.

Исаның атын атап шақыру

Егер саған Құдайға қарсылық ой аяқ астынан келіп, сиынуыңа кедергі жасаса, Исаның атын атап, көмекке шақырсаң жетіп жатыр. Бұл өте қысқа әрі дұшпаныңа тойтарыс беретін әрекет болып саналады. “Тәңірдің аты – сенімді қорған”, – деп жазылған ғой. Сен шын жүректен Исаның атын атап шақырсаң болды, сенімді қорғандамын дей бер, өйткені дұшпан сені қанша әурелесе де зиян келтіре алмайды. Мінәжат ете алмасаң, Исаның атын ата, сонда дұшпанның сенен алыстағанын көресің. Осындай әдісті жиі қолданған сайын, оның ықпалы саған жүрмейтін болады.

Құдайға қарсы ойларды айтпау

Сонымен қатар, сен бір нәрсені естен шығармауың керек – Құдай бәрін біледі. Ол өзіне қарсы мұндай ой сенің жүрегіңнен шықпағанын, мұндай ойды сенің жек көретініңді, бұл үшін сен жауапты емес екеніңді біледі. Бірақ сен Құдайға тіл тигізетін ойларды қуып жібере аласың, тек келген ойларды дауыстап айтпасаң болғаны. Кейбір адамдар маған өздерін осындай ойлар мазалайтынын, бірақ олар сақтық жасап, оларды қағазға жазбағандары туралы айтқаны бар. Ал біреулері абайламай, бұл жексұрын ойларын жазып алған көрінеді. Бұл лас ойлар есімде қалмас үшін менің тезірек Исаның Қанына жүгінуіме тура келді. Қағазға жазылса және ауыздан шығып кетсе бұл ойлардың күшіне енетіні белгілі. Сондықтан Құдайға қарсы ойды ауыздан шығарудан сақтаныңыздар!

Сиқыршылық құралдарын және кітаптарын жою

Осыған байланысты тағы бір ақыл айтайын: сиқыршылықтың бүкіл құралдары мен мұндай тақырыпқа жазылған кітаптар отқа тасталсын! Пауылдың кезінде Ефесте «Сенушілердің көбі келіп, жасаған күнәларын ашық мойындады. Бақсы-балгерлікпен айналысатын бірсыпыра адам сиқырлық кітаптарын әкеліп, көпшіліктің алдында өртеп жіберді. Кітаптардың құнын есептегенде, елу мың күміс теңге болды» (Ел. іст. 19:18,19).

Егер сенің үйінде осындай заттар болса, бәрін отқа жақ! Бойтұмарларың, түс жоритын кітаптар, таға, бал ашатын карта, жұлдызжорамал сияқты сиқыршылықпен байланысты нәрселердің бәрінің көзін жой. Сөйтіп, дұшпаныңмен байланыстыратын ең соңғы жіптің үзілуі қажет.

Киелі кітапты тұрақты түрде оқу

Жын-перімен өзіңді байланыстыратын соңғы жіпті үзген соң, сен Құдаймен тығыз байланысты күшейтуге тиістісің. Ал бұл үшін ең алдымен, күн сайын Киелі кітапты оқығаның жөн.

Бұған сенің былай деп жауап беретініңді алдын ала біліп отырмын: “Киелі кітап маған түсініксіз, бұл мен үшін жұмбақ кітап. Оны оқыған сәтте менің жүрегімде “күрес” басталып, Құдайға тіл тигізетін ойлар келеді. Ал бұл күресті болдырмас үшін, менің Киелі кітапты оқымағаным абзал”.

Дұшпаныңның не тілеп отырғанын байқаған болар-

сың? Ол сені жанымыздың азығы – Киелі кітаптан бұрып алып кетуді аңсауда. Кімде-кім Киелі кітапты күн сайын оқыса, сол арқылы күнәмен күресетін күш жинай алады. Шайтан Киелі кітапты оқуға уақытым жетіспейді деген сылтауды айтқызуға тырысып бағады. Әзәзілдің бұл айла-шарғысына нақты, қатаң ережені қарсы қойған жөн.

Күніне үш рет тізесін бүгіп, Құдайға құлшылық етуді Даниелден үйренейік. Ол мұнысы үшін өзін өлімге кесетініне де көңіл аудармады. Нәтижесінде, мінәжат ету әдеті оның қорғанышына айналды. Міне, бұл қорғану тәсілі бізге де қажет. Осылай етсек, дұшпан Киелі кітапты оқуымызға кедергі жасай алмайды.

Киелі кітапты белгілі бір уақытта, бәрінен дұрысы – ертемен оқуды әдетке айналдыруымыз қажет. Киелі Рухтан Сөздің мәнін ашуды, оны түсініп, өмірде қолдана алуыңды сұра. Сонда сен көп кешікпей Зәбүрдің жыршысындай:

«Сенің сөздерің қадамдарымды жарқыратады, Өмір жолыма шырақтай нұрын шашады», – деп айта аласың.

Мінәжат етудегі тұрақтылық

Киелі кітапты оқу мен мінәжат етудің қатар жүргені дұрыс. Бұл, әрине, саған қиын, шайтан аузыңды жауып, бүкіл ойыңды сан-саққа жүгіртіп жібергендей болып көрінуі мүмкін. Мінәжат етіп отырғанда көзіңе ұйқы тығылуы да ғажап емес. Егер осылай болып бара жатса, мінәжатты дауыстап айтуға тырыс. Мінәжатты көркемдеп айту жағын ойламай-ақ қой. Мәселе әдемі сөздерде емес: Құдай жүрекке

қарайды. Шын жүрегіңмен сиын. Құдайға ойыңдағы ауыртпалықтың бәрін айт.

Егер қалай мінәжат ету керектігін білмесең, Құдай Сөзі саған көмектессін. Оқығаныңды мінәжатқа айналдыр. Құдай Сөзін оқып отырып: “Мен осындаймын ба? Менде осы қасиеттер бар ма? Мен бұл жайында білемін бе?” – деген сауалдарды өзіңе қоя отырып оқы. Егер сен ондай болмасаң, онда мұны мінәжаттың негізі етіп ал. Сөйтіп, сен Киелі кітаптың көмегімен мінәжат етуді үйренесің.

Сенушілермен қарым-қатынаста болу

Сенушілермен қарым-қатынаста бол. Егер сен тұрған жерде қауым болса, сонда барып, ондағылардан өзіңмен бірге мінәжат етулерін өтін. Егер жақын маңда қауым болмаса, онда сенушілермен кездесіп бас қосудың кез келген мүмкіндігін пайдалан, олармен бірге Киелі Жазбаны оқып, мінәжат ет. Бұл жаныңды сергітіп, рухани нығайтатынына көзің әлі-ақ жетеді. Егер жақын жерде сенушілердің қауымы немесе Киелі кітап үйірмесі болмаса, онда рухани әдебиеттерді оқы, конференцияларға қатыс. Бұған қазіргі кезде әркімнің қолы жетеді.

Дегенмен, ең бастысы – Исаға жақын бол. Исаның жың-пері туралы айтқан мысалын еске түсір: үйден шығып, сусыз жерлерді кезіп келген ол шыққан үйіне қайтып оралғанда, үйдің сыпырылып, жиналғанын көреді. Сонда ол қайта барып, өзінен де қатігез жеті жыңды алып келеді; сөйтіп адамға кейінгісі бастапқысынан да жаман болмақ.

Бұл мысал бізді сақтандырып, біздің Исамен бірге болып, Оның Киелі Рухын жүрекпен қабылдауымыз қажет екенін ескертеді. Егер біз қорғанышсыз қалсақ, дұшпан қайта оралып, өз билігін қайта орнатады.

Құдаймен одағымыз

Шайтанның шырмауынан құтылғың келсе Құдаймен бірлікті нығайт, әр уақытта Онымен біржолата одақтас болып қал. «Иса, менің жүрегіме енші, ақтық деміме дейін өмірімді Сенімен бірлікте өткізгім келеді», – деп мінәжат ет. Шайтанның шырмауынан босануға болады, алайда бұл үшін күш жұмсау қажет. Мұны көптеген куәлер де растайды. Міне, солардың бірі: “Осыдан он екі жыл бұрын мен әуестіктің арқасында қартамен бал ашушыға барған едім. Ал төрт жыл бұрын маған тілме ауруын дуа арқылы жазып берді. Бал аштырғаннан кейін араға біраз айлар салып, аяқ астынан басыма өзімді-өзім өлтіру туралы ой келді де, ешбір себепсіз үйдің төртінші қабатынан секіре жаздадым. Сол кезден бастап осы ойдан арыла алмай-ақ қойдым, мұның мен үшін қауіпті болғаны сонша, тіпті кейде осы арпалыста есімнен алжасып қаламын ба деп қорқатын болдым. Ал сыртынан қарағанда бәрі тыныш секілді, тіпті тамаша десе де болады. Өзімді-өзім өлтіру туралы соңғы ой өткен жылдың тамыз айында көкейіме қайта оралып, мен суға кетпек болдым. Сол кезде мен адамды кісендеп, уысынан шығармайтын дүлей күш туралы оқыдым және естідім. Мен қатты тынышсыздандым, жаным жай таба алмай, күні-түні сиындым, әйтпегенде, ақылымнан айырылып, өзімді-өзім өлтірер едім.

Сондай бір ұйқысыз өткен түнде, маған Құтқарушы Иса Мәсіх келді: мен кенет селт етіп, тіпті денемнен шайтанның шырмауының қалай сыпырылып түскенін сезіндім. Сөйтіп, көптен күткен тыныштық жүрегіме орнап, сауыққанымды айқын білдім.

Содан бері мен басқа адаммын, Тәңірімнің қорғауында екенімді анық білемін. Бостандық беретін, бәрін жеңетін күш тек қана Исада... Енді қазіргі жағдайыма қуанышпен, ризашылықпен қарай отырып, болашығыма үмітпен қадам басамын”.

Аудармашының соңғы сөзі

Адамзат баласының бойында баға жетпес бір асыл байлық бар. Ол – денсаулық. Халқымыздың: “Өуелгі байлық – денсаулық” деуі де сондықтан болар. “Тәні саудың – жаны да сау”, деген мәтелдің де мәні осыған саяды. Бірақ бізді қоршаған ортадағы экологиялық ауыр жағдай, басқа да қиын тіршілік мәселелері ет пен сүйектен жаралған адамның басын ауыртып, балтырын сыздатпай қоймайды ғой. Осындайда “басқа түскен баспақшыл” демекші, денсаулыққа дем берер, ажалға араша тұрар адамды іздейміз. Міне, қауым бағушысы Эрнст Модерзонның қолыңызға ана тілінде тиіп отырған “Шайтанның шырмауында” деген кітабы, осы “баспақшыл” болған сіздерді өзөзілдің “шырмауына” түсіп қалудан сақтандырады.

Кітап осыдан сексен жылдан астам бұрын жарық көргеніне қарамастан, бүгінгі оқырманның да ойынан шығады деген ниеттеміз.

Мазмұны

Алғы сөз	3
Бұл кітапты жазуға неге бел байладым	5
Киелі Жазбане дейді?	12
Балалардықұрбандыққашалу	13
Белгілер менқұбылыстарды пайымдау	17
Сиқыршылық, көзбайлаушылық.....	21
Аруақтарды шақыру	26
Оккультизмнің кейбір түрлері	33
Сүйелді дуалау	33
Тіс ауруын және басқа ауруларды дуалап оқыту	36
Құтқарылу мейрамының суы және емдеудің басқа да магиялық тәсілдері	39
«Аспан» хаттары мен «отты» хаттар	42
Мұсаның 6 және 7- кітаптары	42
Сиқыршылықтың салдары.....	45
Жан тыныштығының жоқтығы	46
Өзін-өзі өлтіру туралы ойлар	47
Қырсық ойлар	48
Құдайдың Сөзін түсінбеушілік	49
Өлім туралы ойлар	50
Картамен бал ашу және оның зардабы	53
Спиритизмнің нәтижесі	61
Ыдыс айналдыру	62

Магнетизм	65
Қауіпті тәжірибелер	66
Көз байлау (гипноз)	69
Теософия	74
Спиритуализм	76
Астрология	80
Шайтанның шырмауынан қалай құтылуға болады?	82
Күнәні мойындау	82
Тәубеге келу – сананың өзгеруі	84
Сенім және сиыну	86
Мінажатпен қолдау	87
Ораза тұту	88
Қол қойып сиыну	89
Алғыс айту	91
Исаның атын атап шақыру	92
Құдайға қарсы ойларды айтпау	92
Сиқыршылықтың заттарын және кітаптарын құрту	93
Киелі кітапты тұрақты түрде оқу	93
Дұға етудегі тұрақтылық	94
Құдай балаларымен қарым-қатынаста болу ...	95
Құдаймен одақ құру	96
Аудармашының соңғы сөзі	97

Осы кітап жайлы ой-пікіріңіз немесе сұрақтарыңыз болса, мына мекен-жайға хабарласыңыз:

050031 Алматы

п/ж 68

«ШЫҒЫС СӘУЛЕСІ»

liokaz@pactec.kz

Commercom@topmail.kz

www.shsaulesi.at.ua

"Веретельный"
баспаханасында басылды.

Есік қаласы, Белек,
Заводская көшесі, 7.

Таралымы – 5000 дана.